



14749/24

**Comhad Idirinstitiúideach:
2023/0165(COD)**

**CODEC 1972
TRANS 444
MAR 169
OMI 94
ILO 15
PE 242**

NÓTA FAISNÉISE

| | |
|--------|---|
| ó: | Ardrúnaíocht na Comhairle |
| chuig: | Coiste na mBuanionadaithe/An Chomhairle |
| Ábhar: | Togra le haghaidh TREOIR Ó PHARLAIMINT NA hEORPA AGUS ÓN gCOMHAIRLE lena leasaítear Treoir 2009/16/CE maidir le rialú arna dhéanamh ag Stát an chalafoirt – An toradh ar an gcéad léamh i bParlaimint na hEorpa agus an nós imeachta ceartúcháin (Strasbourg, an 10 Aibreán 2024 agus an 22 Deireadh Fómhair 2024) |

I. RÉAMHRÁ

I gcomhréir le forálacha Airteagal 294 CFAE agus leis an dearbhú comhpháirteach maidir le socrúithe praiticiúla i ndáil leis an nós imeachta comhchinnteoireachta¹, bhí roinnt teagmhálacha neamhfhoirmiúla ann idir an Chomhairle, Parlaimint na hEorpa agus an Coimisiún d'fhonn teacht ar chomhaontú faoin gcomhad reachtach seo ar an gcéad léamh.

Measadh go rachadh an comhad sin² faoi réir an nós imeachta ceartúcháin³ i bParlaimint na hEorpa tar éis don Pharlaimint a bhí ann roimhe seo an seasamh uaithi a ghlacadh ar an gcéad léamh.

¹ IO C 145, 30.6.2007, lch. 5.

² 10819/24 + COR 1.

³ Riail 251, Rialacha Nós Imeachta Parlaimint na hEorpa.

II. VÓTÁIL

Ag an gcruinniú a bhí aici an 10 Aibreán 2024, ghlac Parlaimint na hEorpa leasú 41 (gan athbhreithniú dlítheangeolaíoch) ar an togra ón gCoimisiún agus rún reachtach, arb é atá ann an seasamh ó Pharlaimint na hEorpa ar an gcéad léamh. Léirítear ann an méid a comhaontaíodh go sealadach idir na hinstiúidí.

Tar éis do na dlítheangeolaithe bailchríoch a chur ar an téacs a glacadh, d'fhorpheas Parlaimint na hEorpa an 22 Deireadh Fómhair 2024 ceartúchán ar an seasamh a glacadh ar an gcéad léamh.

Faoi chuimsiú an cheartúcháin sin, ba cheart go mbeadh an Chomhairle in ann an seasamh ó Pharlaimint na hEorpa a fhorpheas, mar a leagtar amach san Iarscríbhinn⁴ a ghabhann leis seo é, rud a thabharfadh an chéad léamh chun críche i gcás an dá instiúid.

D'fhéadfaí an gníomh a ghlacadh ina dhiaidh sin san fhoclaíocht a fhreagraíonn don seasamh ó Pharlaimint na hEorpa.

⁴ Leagtar amach téacs an cheartúcháin san Iarscríbhinn. Cuirtear i láthair mar théacs comhdhlúite é, agus léirítear athruithe ar an togra ón gCoimisiún i gcló trom iodálach. Is leis an tsiombail ‘**I**’ a léirítear téacs a scriosadh.

P9_TA(2024)0201

Leasú ar Threoir 2009/16/CE maidir le rialú Stáit ar chalafoirt

Rún reachtach ó Pharlaimint na hEorpa an 10 Aibreán 2024 ar an togra le haghaidh treoir ó Pharlaimint na hEorpa agus ón gComhairle lena leasaítear Treoir 2009/16/CE maidir le rialú Stáit ar chalafoirt (COM(2023)0271 – C9-0191/2023 – 2023/0165(COD))

(An gnáthnós imeachta reachtach: an chéad léamh)

Tá Parlaimint na hEorpa,

- ag féachaint don togra ón gCoimisiún chuig Parlaimint na hEorpa agus chuig an gComhairle (COM(2023)0271),
 - ag féachaint d’Airteagal 294(2) agus d’Airteagal 100(2) den Chonradh ar Fheidhmiú an Aontais Eorpaigh, ar dá mbun a thíolaic an Coimisiún an togra do Pharlaimint na hEorpa (C9-0191/2023),
 - ag féachaint d’Airteagal 294(3) den Chonradh ar Fheidhmiú an Aontais Eorpaigh,
 - ag féachaint do thuairim ó Choiste Eacnamaíoch agus Sóisialta na hEorpa an 20 Meán Fómhair 2023¹,
 - tar éis dul i gcomhairle le Coiste na Réigiún,
 - ag féachaint don chomhaontú sealadach a d’fhormheas an coiste freagrach faoi Riail 74(4) dá Rialacha Nós Imeachta agus don gheallúint a thug ionadaí na Comhairle i litir dar dáta an 15 Márta 2024 go ndéanfadh sí seasamh Parlaimint na hEorpa a fhormheas, i gcomhréir le hAirteagal 294(4) den Chonradh ar Fheidhmiú an Aontais Eorpaigh,
 - ag féachaint do Riail 59 dá Rialacha Nós Imeachta,
 - ag féachaint don tuairim ón gCoiste um Iascach,
 - ag féachaint don tuarascáil ón gCoiste um Iompar agus um Thurasóireacht (A9-0419/2023),
1. ag glacadh a seasaimh ar an gcéad léamh mar a leagtar amach ina dhiaidh seo é;
 2. á iarraidh ar an gCoimisiún an t-ábhar a tharchur chuig Parlaimint na hEorpa arís má dhéanann sé téacs eile a chur in ionad a thogra, má dhéanann sé a thogra a leasú go substaintiúil nó má tá sé ar intinn aige a thogra a leasú go substaintiúil;
 3. á threorú dá hUachtarán a seasamh a chur ar aghaidh chuig an gComhairle, chuig an gCoimisiún agus chuig na parlaimintí náisiúnta.

¹ IO C, C/2023/876, 8.12.2023, ELI: <http://data.europa.eu/eli/C/2023/876/oj>

P9_TC1-COD(2023)0165

Seasamh ó Pharlaimint na hEorpa arna ghlacadh ar an gcéad léamh an 10 Aibreán 2024 chun go nglacfaí Treoir (AE) 2024/... ó Pharlaimint na hEorpa agus ón gComhairle lena leasaítear Treoir 2009/16/CE maidir le rialú arna dhéanamh ag Stát an chalafoirt

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 100(2) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa¹,

Tar éis dóibh dul i gcomhairle le Coiste na Réigiún **■** ,

Ag gníomhú dóibh i gcomhréir leis an ngnáthnós imeachta reachtach²,

¹ IO C, C/2023/876, 8.12.2023, ELI: <http://data.europa.eu/eli/C/2023/876/oj>.

² Seasamh ó Pharlaimint na hEorpa an 10 Aibreán 2024.

De bharr an mhéid seo a leanas:

- (1) Le Treoir 2009/16/CE ó Pharlaimint na hEorpa agus ón gComhairle³, leagtar amach rialacha maidir leis an gcóras le haghaidh cigireachtaí um rialú arna dhéanamh ag Stát an chalafoirt, lena ndéantar cigireacht ar longa incháilithe a thugann cuairt ar chalafoirt an Aontais chun a sheiceáil an gcomhlíonann inniúlacht ■ an chriú ar bord agus bail na loinge agus a trealaimh ceanglais na gcoinbhinsiún idirnáisiúnta maidir le sábháilteacht anama ar muir ■ , maidir le cosaint na muirthimpeallachta ***agus maidir le dálaí maireachtála agus oibre ar longa faoi gach bratach.***
- (2) Tá Treoir 2009/16/CE bunaithe ar an ***gcomhaontú*** deonach atá ann cheana faoi Mheabhrán Comhthuisceana Pháras um rialú arna dhéanamh ag Stát an chalafoirt a síníodh an 26 Eanáir 1982 ('Meabhrán Comhthuisceana Pháras') agus ar choincheap an ualaigh chomhroinnte cigireachta, coincheap an spriocdhírithé rioscabhunaithe ar longa ar a ndéanfar cigireachtaí, coincheap na gcigireachtaí comhchuibhithe agus coincheap chomhroinnt thorthaí na gcigireachtaí.
- (3) Ó tháinig Treoir 2009/16/CE i bhfeidhm, tá athruithe tagtha ar an timpeallacht rialála idirnáisiúnta, go háirithe i Meabhrán Comhthuisceana Pháras agus san Eagraíocht Mhuirí Idirnáisiúnta (IMO), agus tharla forbairtí teicneolaíochta. Ba cheart na hathruithe sin chomh maith leis an taithí a fuarthas ó chur chun feidhme Threoir 2009/16/CE a chur san áireamh.

³ Treoir 2009/16/CE ó Pharlaimint na hEorpa agus ón gComhairle an 23 Aibreán 2009 maidir le rialú arna dhéanamh ag Stát an chalafoirt (IO L 131, 28.5.2009, lch. 57).

- (4) Tá roinnt coinbhinsiún idirnáisiúnta daingnithe ag na Ballstáit agus tagtha i bhfeidhm ó bhí 2011 ann. Is iad sin an Coinbhinsiún Idirnáisiúnta um Rialú agus Bainistiú Uisce Ballasta agus Dríodar Long a glacadh an 13 Feabhra 2004 ('Coinbhinsiún BWM') agus Coinbhinsiún Idirnáisiúnta Nairobi maidir le Raiceanna a Bhaint a glacadh an 18 Bealtaine 2007 ('Coinbhinsiún Nairobi'). Dá bhrí sin, ba cheart na coinbhinsiúin idirnáisiúnta sin a áireamh ar liosta na **g**Coinbhinsiún a chumhdaítear le Treoir 2009/16/CE, ionas gur féidir iad a fhorfheidhmiú *mar chuid den* chóras um rialú arna dhéanamh ag Stát an chalafoirt.
- (5) Chun córas um rialú arna dhéanamh ag Stát an chalafoirt atá *cothrom le dáta* agus comhchuibhithe a éascú, is gá bealach níos tapúla a bheith ann chun liosta na gcoinbhinsiún idirnáisiúnta arna bhforfheidhmiú le rialú arna dhéanamh ag Stát an chalafoirt a thabhairt cothrom le dáta gan gá le Treoir 2009/16/CE ina hiomláine *a leasú*. Dá bhrí sin, maidir le Coinbhinsiún idirnáisiúnta, a luaithe a bhainfear amach leibhéal comhaontaithe daingniúcháin ina leith agus a thiocfaidh sé i bhfeidhm dá thairbhe sin, agus tar éis do Stáit is sínitheoirí le Meabhrán Comhthuisceana Pháras é a ghlacadh mar ionstraim ábhartha, ba cheart don Choimisiún liosta na gCoinbhinsiún dá dtagraítear i dTreoir 2009/16/CE a thabhairt cothrom le dáta.
- (6) Tiocfaidh Coinbhinsiún Idirnáisiúnta Hong Cong maidir le hAthchúrsáil Long ar Bhealach Sábháilte agus Neamhdhíobhálach don Chomhshaol, a glacadh an 15 Bealtaine 2009, ('Coinbhinsiún Hong Cong') i bhfeidhm an 26 Meitheamh 2025. Le Treoir 2009/16/CE, ba cheart foráil a dhéanamh maidir le forfheidhmiú an Choinbhinsiúin sin.

- (7) *Le comhaontuithe agus coinbhinsiúin idirnáisiúnta iascach, amhail Comhaontú Cape Town 2012 maidir le Cur Chun Feidhme Fhorálacha Phrótacal 1993 a bhaineann le Coinbhinsiún Idirnáisiúnta Torremolinos um Shábháilteacht Soithí Iascaireachta, 1977 ('Comhaontú Cape Town'), Coinbhinsiún 188 na hEagraíochta Idirnáisiúnta Saothair maidir le hObair san Iascaireacht, 2007, agus an Coinbhinsiún Idirnáisiúnta maidir le Caighdeán Oiliúna, Deimhniúcháin agus Faire do Phearsanra Soithí Iascaireachta 1995 (STCW-F), is féidir feabhas a chur ar shábháilteacht soithí iascaireachta agus ar dhálaí oibre agus maireachtála na n-iascairí ar bord agus cothroime iomaíochta idirnáisiúnta níos cothroime a chruthú san earnáil sin.*
- (8) Mar gheall ar a méid bheag, oibríonn formhór na soithí iascaireachta san Aontas in uiscí teorann agus ní dócha go ndéanfar cigireacht orthu i gcalafoirt eachtracha. Ciallaíonn sé sin, go ginearálta, gur dócha gurb iad soithí iascaireachta 24 mhéadar ar fad *nó níos faide, agus fad á bhreithniú mar a shainmhínítear é i gComhaontú Cape Town*, arb iad freisin na soithí iascaireachta ■ is minice a chuirtear faoi réir coinbhinsiúin idirnáisiúnta, agus iadsan amháin a oibreodh in uiscí idirnáisiúnta agus a thabharfadh cuairt ar chalafoirt seachas na calafoirt sin sa tír ina bhfuil siad cláraithe agus, dá bhrí sin, atá le bheith faoi réir *rialú arna dhéanamh ag Stát an chalafoirt*. Ós rud é go bhfuil formhór na gcoinbhinsiún idirnáisiúnta is infheidhme maidir le soithí iascaireachta móra difriúil leis na cinn *atá* á bhforfheidhmiú faoi láthair trí rialú arna dhéanamh ag Stát an chalafoirt agus chun éifeachtaí *iarmhartacha* neamh-inmhianaithe ar an gcóras um rialú arna dhéanamh ag Stát an chalafoirt atá ann faoi láthair a sheachaint, ba cheart córas comhthreomhar ar leithligh um rialú arna dhéanamh ag Stát an chalafoirt maidir le soithí iascaireachta a bhunú. ■

- (9) Mar gheall ar na patrúin iascaireachta, áfach, ní ar gach ■ Ballstát a thugann soithí iascaireachta móra den sórt sin cuairt. Dá bhrí sin, maidir leis na Ballstáit ■ sin ar mian leo cigireachtaí den sórt sin a dhéanamh, ba cheart córas deonach a bhunú, ar córas é atá **comhthreomhar** leis an gcóras um rialú arna dhéanamh ag Stát an chalafoirt atá ann faoi láthair **agus** ar leithligh uaidh, chun solúbthacht a sholáthar sa dóigh a bhforbraítear caighdeáin um rialú arna dhéanamh ag Stát an chalafoirt. Dá bhrí sin, is féidir leis na Ballstáit, na Stáit is sínitheoirí le Meabhrán Comhthuisceana Pháras agus an Coimisiún córas den sórt sin um rialú arna dhéanamh ag Stát an chalafoirt ar shoithí iascaireachta atá ■ 24 mhéadar ar fad **nó níos faide** a fhorbairt go nádúrtha **gan soithí den sórt sin a ionchorprú i Meabhrán Comhthuisceana Pháras reatha chun feabhas a chur ar an gcomhar maidir le rialú arna dhéanamh ag Stát an chalafoirt ar fud chalafoirt an Aontais a fhaigheann soithí den sórt sin agus chun feabhas a chur ar shábháilteacht sa tionscal iascaireachta, lena n-áirítear sláinte agus sábháilteacht na n-iascairí ar bord. Chuige sin, ba cheart modúl ar leithligh don bhunachar sonraí cigireachta atá ann cheana a fhorbairt. Le córas deonach den sórt sin, d'fhéadfaí cabhrú leis na Ballstáit i gcomhthéacs nós imeachta daingniúcháin Chomhaontú Cape Town, agus ullmhú dá theacht i bhfeidhm, mar a údaraítear le Cinneadh 2014/195/AE ón gComhairle⁴, chun na caighdeáin is airde is féidir a bhunú maidir le sábháilteacht soithí móra iascaireachta. ■**

⁴ Cinneadh ón gComhairle an 17 Feabhra 2014 lena n-údaraítear do na Ballstáit Comhaontú Cape Town 2012 maidir le Cur Chun Feidhme Fhorálacha Phrótacal Torremolinos 1993 a bhaineann le Coinbhinsiún Idirnáisiúnta Torremolinos um Shábháilteacht Soithí Iascaireachta, 1977, a shíniú, a dhaingniú nó aontú dó (IO L **106, 9.4.2014, lch. 4**).

- (10) Leis an sásra um chion cothrom, foráiltear do leithdháileadh an ualaigh cigireachta i measc na Stát is sínitheoirí le Meabhrán Comhthuisceana Pháras. Cionroinntear líon áirithe cigireachtaí ar gach Stát is sínitheoir. Leis an líon sin, léirítear a ghealltanais cigireachta nó a ‘chion cothrom’, atá le déanamh gach bliain. Déantar incháilitheacht soithigh le haghaidh cigireachta a chinneadh go príomha de réir na tréimhse ama **atá caite ó rinneadh an chigireacht dheireanach, *in éineacht leis an bpróifíl riosca loinge, lena mbunaítear na heatrainmh idir cigireachtaí, chomh maith le raon feidhme na gcigireachtaí.*** Féadfar cigireacht a dhéanamh ar longa faoi Thosaíocht II agus ***ní mór*** cigireacht a dhéanamh ar longa faoi Thosaíocht I.
- (11) Ba cheart cead a bheith ag na Ballstáit ***gan*** líon áirithe cigireachtaí de chineál ‘Tosaíocht’ ***a dhéanamh, rud*** nach ndéanfadh difear do chomhlíonadh a ngealltanais cigireachta. I gcás roinnt Ballstát, is féidir le líon na long faoi Thosaíocht a thugann cuairt go hiarbhír ar a gcalafoirt le linn bliain ar leith a bheith níos mó ná an gealltanais cigireachta cionroinnte nó níos lú ná an gealltanais sin. Modh eile a bhí mar mhalairt ar an sásra um chion cothrom lena ligeadh do na Ballstáit (ró-ualaithe nó tearc-ualaithe) sin comhlíonadh a bhaint amach, rinneadh amach gur modh dolúbtha a bhí sa mhodh sin, agus is gá, dá bhrí sin, na forálacha lena mbaineann a ailíniú le forálacha Mheabhrán Comhthuisceana Pháras.

- (12) Tá cead ag na Ballstáit freisin cigireachtaí ar longa a chur siar faoi imthosca áirithe, ar choinníoll go ndéanfar cigireacht ar an long sa chéad chalafort cuarda eile nó laistigh de 15 lá. Ba cheart an fhéidearthacht sin a oiriúnú ionas gur féidir leis na Ballstáit uile leas a bhaint aisti. Ceanglaítear ar chatagóirí áirithe long a mheastar go bhfuil riosca níos airde ag baint leo, agus atá incháilithe, dá bhrí sin, i leith cigireacht mhéadaithe, fógra a thabhairt faoina n-am teachta measta chuig calafort 72 uair an chloig sula dtiocfaidh siad. Tar éis roinnt blianta, áfach, thángthas ar an gconclúid go raibh an oibleagáid sin róthrom ar oibreoirí agus nach raibh aon luach breise ag baint léi mar go bhfuil teacht níos éasca ar an bhfaisnéis faoin am teachta measta cheana féin ag na húdaráis náisiúnta i mbunachar sonraí THETIS. Ar an mbonn sin, chuir Meabhrán Comhthuisceana Pháras deireadh leis an oibleagáid fógra réamhtheachta a thabhairt **agus** ba cheart, dá bhrí sin, Treoir 2009/16/CE a ailíniú dá réir sin.
- (13) *Faoi ghnáth-imthosca, is roghnach agus ní éigeantach a bhíonn cigireachtaí ar longa faoi Thosaíocht II. Mar sin féin, maidir leis na Ballstáit sin nach bhfaigheann go leor cuairteanna ó longa atá incháilithe le haghaidh cigireachta chun a ngealltanais bliantúil a chomhlíonadh, ní mór dóibh cigireacht a dhéanamh ar longa faoi Thosaíocht II chun a ngealltanais cigireachta bliantúil a bhaint amach. Ós rud é, i gcás na mBallstát sin, go ndéantar cigireachtaí éigeantacha de facto de na cigireachtaí sin, d'fhéadfadh sé go mbeadh gá le níos mó solúbthachta le haghaidh cigireachtaí ar longa faoi Thosaíocht II, go sonracha do Bhallstáit den sórt sin. Dá bhrí sin, ba cheart do Bhallstáit den sórt sin a bheith in ann na cigireachtaí sin a chur siar ar choinníoll go dtugann siad údar maith le cur siar den sórt sin.*
- (14) *Mura ndéantar cigireacht mar gheall ar imthosca urghnácha gan choinne a fhágann nach féidir cigireacht a dhéanamh, amhail tubaiste nádúrtha, paindéim, éigeandáil sláinte poiblí nó ionsaí sceimhlitheoireachta, níor cheart é sin a áireamh mar chigireacht a cailleadh. Ba cheart údar cuí a thabhairt leis na himthosca sin agus iad a thuairisciú don Choimisiún.*

- (15) Le 10 mbliana anuas agus in ainneoin méaduithe ar líon na soithí a thugann cuairt ar chalafoirt ■ de chuid an Aontais, lena n-áirítear iompar loingseoireachta gearrthuais earraí idir príomhchalafoirt sna Ballstáit agus calafoirt atá lonnaithe san Eoraip gheografach nó i dtíortha nach bhfuil san Eoraip ar an Meánmhuir agus ar an Muir Dhubh, tá feabhas ■ tagtha ar phróifíl sábháilteachta na long a thugann cuairt ar chalafoirt ■ de chuid an Aontais. Tá cigireachtaí um rialú arna dhéanamh ag Stát an chalafoirt á n-úsáid níos mó agus níos mó chun dlíthe maidir leis an gcomhshaol a fhorfheidhmiú, amhail dlíthe i ndáil le hastaíochtaí sulfair nó i ndáil le longa a athchúrsáil go sábháilte agus ar bhealach atá neamhdhíobhálach don chomhshaol. I **ndáil leis an méid sin, ba cheart don Aontas, i gcomhréir lena ghealltanais a bhaineann leis an muirthempeallacht a chosaint**, leanúint dá cheannaireacht a **fheidhmiú** in earnáil ■ a rialaítear ar an leibhéal Eorpach agus ar an leibhéal idirnáisiúnta araon ■ . Mar sin féin, bhí tosaíochtaí difriúla ag baint leis an bpróifíl riosca loinge a ceapadh roimh 2009 agus níor cuireadh in oiriúint go hiomlán fós í chun an iarracht chigireachta a dhíriú ar na longa is lú feidhmíocht ó thaobh an chomhshaoil de. ■ Dá bhrí sin, ba cheart an phróifíl riosca loinge a thabhairt cothrom le dáta chun saincheisteanna comhshaoil a léiriú trí thuilleadh tábhachta a thabhairt d'fheidhmíocht chomhshaoil ■ na long.
- (16) **Tar éis** do IMO an t-athbhreithniú ar a tháscaire déine carbóin a thabhairt i gcrích, ba cheart don Choimisiún **measúnú a dhéanamh ar oiriúnacht an táscaire** déine carbóin **sin mar pharaiméadar** comhshaoil a úsáidtear chun an phróifíl riosca atá ag long a chinneadh faoi Threoir 2009/16/CE **agus breithniú a dhéanamh an ndéanfadh sé togra reachtach a thíolacadh, de réir mar is iomchuí.**

- (17) *Glacadh modheolaíocht nua faoi Mheabhrán Comhthuisceana Pháras in 2019, lenar bunaíodh liostaí ardfheidhmíochta, meánfheidhmíochta agus ísealfheidhmíochta, mar mhalairt ar liostaí na Stát brataí dar dath bán, liath agus dubh. Agus na gníomhartha cur chun feidhme ábhartha á nglacadh, ba cheart aird ar leith a thabhairt ar an modheolaíocht sin, ar modheolaíocht í lena mbunaítear catagóiríú na Stát brataí. Le cur chun feidhme na modheolaíochta sin faoin Treoir seo, ba cheart cothroime a áirithiú, go háirithe maidir leis an gcaoi a gcaítear le Stáit bhrataí a bhfuil cabhlaigh bheaga acu.*
- (18) *Ós rud é go dteastaíonn am ó oifigigh um rialú arna dhéanamh ag Stát an chalafoirt chun cigireachtaí a ullmhú agus a dhéanamh, tá sé tábhachtach a áirithiú go bhfuil dóthain ama ar fáil. Tá tábhacht ar leith ag baint leis sin i gcás cigireachtaí méadaithe, agus, chomh maith leis sin, i gcás cigireachtaí ar longa paisinéirí róró atá i seirbhís rialta, i gcás inar féidir oibriú an tsoithigh a mheas.*
- (19) *Mar gheall ar raon feidhme na gcigireachtaí méadaithe, ba cheart iad a bheith déanta ag beirt chigirí um rialú arna dhéanamh ag Stát an chalafoirt ar a laghad. I gcás nach féidir an méid sin a dhéanamh ar chúiseanna oibiachtúla, amhail sainiúlachtaí an chalafoirt (foireann theoranta, fadhbanna inrochtaineachta), toisc go raibh an fógra teachta róghearr nó toisc go dtagann an chigireacht mhéadaithe chun bheith riachtanach mar gheall ar thosca gan choinne nó tosca forcheannasacha, ba cheart na cúiseanna sin a thaifeadadh go cuí.*

- (20) Tá an digitiú ina ghné thábhachtach den dul chun cinn teicneolaíoch i réimse an bhailithe sonraí agus na cumarsáide sonraí, d'fhonn cabhrú le costais a laghdú agus le húsáid éifeachtúil a bhaint as acmhainní daonna. Tá méadú ag teacht ar líon na long a bhfuil deimhnithe leictreonacha ar bord faoi láthair agus meastar go dtiocfaidh méadú eile ar an líon sin. Dá bhrí sin, ba cheart éifeachtacht an rialaithe arna dhéanamh ag Stát an chalafoirt a fheabhsú trí *thuilleadh* úsáide a bhaint as deimhnithe leictreonacha, ionas gur féidir cigireachtaí a *dhírítear ar longa* agus atá níos ullmhaithe a dhéanamh. ■
- (21) Tá méadú ag teacht ar chastacht an rialaithe arna dhéanamh ag Stát an chalafoirt de réir mar a chuirtear ceanglais chigireachta nua leis, faoi dhlí an Aontais nó le IMO *mar léiriú ar an dlúthnasc idir cúinsí sláinte, sábháilteachta, slándála agus sóisialta*. Is gá, dá bhrí sin, uas-sciliú agus athoiliúint na n-oifigeach um rialú arna dhéanamh ag Stát an chalafoirt a áirithiú agus an oiliúint a chuirtear orthu a fhorbairt go leanúnach. *Leis sin, beidh údaráis inniúla Stáit an chalafoirt in ann fíorú a dhéanamh ar chomhlíonadh na gcoinbhinsiún idirnáisiúnta is infheidhme maidir le sábháilteacht agus slándáil mhuirí, maidir le cosaint na muirthimpeallachta agus maidir le dálaí maireachtála agus oibre ar bord, i ndáil leis na longa a thugann cuairt ar a gcalafoirt. Agus gníomhaíochtaí faireacháin den sórt sin á ndéanamh aige, níl Stát an chalafoirt le cur isteach ar inniúlachtaí an Stáit brataí, mar a leagtar amach i dTreoir 2013/54/AE ó Pharlaimint na hEorpa agus ón gComhairle⁵. ■*

⁵ Treoir 2013/54/AE ó Pharlaimint na hEorpa agus ón gComhairle an 20 Samhain 2013 maidir le freagrachtaí áirithe na Stát brataí maidir le comhlíonadh agus forfheidhmiú an Choinbhinsiúin Oibreachais Mhuirí, 2006 (IO L **329**, **10.12.2013**, *lch. 1*).

- (22) Tá sé de cheangal ar chórais riaracháin Stáit bhrataí na mBallstát, i gcomhréir le Treoir 2009/21/CE ó Pharlaimint na hEorpa agus ón gComhairle⁶, córas bainistithe cáilíochta a bheith acu chun cabhrú leis na Ballstáit a bhfeidhmíocht mar Stáit bhrataí a fheabhsú a thuilleadh agus chun cothrom iomaíochta idir córais riaracháin a áirithiú. Le ceanglas comhchosúil maidir le córais riaracháin um rialú arna dhéanamh ag Stát an chalafoirt, ba cheart na Ballstáit a bheith in ann a dheimhniú gur iomchuí eagrú na gcóras riaracháin sin, mar aon lena mbeartais, a bpróisis, a n-acmhainní agus a ndoiciméadacht, chun cuspóirí na Treorach seo a bhaint amach **■**. ***Chun a áirithiú go mbeidh a ndóthain ama ag na Ballstáit an ceanglas sin a chur chun feidhme***, ba cheart ***deimhniú an chórais bainistithe cáilíochta sin a ailíniú*** leis an ***ngnátheatramh iniúchóireachta don chóras atá ann cheana faoi*** Threoir 2009/21/CE.

⁶ Treoir 2009/21/CE ó Pharlaimint na hEorpa agus ón gComhairle an 23 Aibreán 2009 maidir le ceanglais Stát brataí a chomhlíonadh (IO L 131, 28.5.2009, lch. 132).

(23) Chun gur féidir cur i bhfeidhm Threoir 2009/16/CE a thabhairt cothrom le dáta ionas go bhfuil na Ballstáit in ann a n-oibleagáidí faoin dlí idirnáisiúnta a chomhlíonadh i gcomhréir leis an treoir sin, ba cheart an chumhacht chun gníomhartha a ghlacadh i gcomhréir le hAirteagal 290 den Chonradh ar Fheidhmiú an Aontais Eorpaigh a tharmligean chuig an gCoimisiún *i dtaca le liosta* na gCoinbhinsiúin a thabhairt cothrom le dáta faoi raon feidhme Threoir 2009/16/CE agus i dtaca le leasú a dhéanamh ar liosta na nósanna imeachta agus na dtreoirínte a bhaineann le rialú arna dhéanamh ag Stát an chalafoirt arna ghlacadh faoi *Mheabhrán Comhthuisceana* Pháras. Tá sé tábhachtach, go háirithe, go rachadh an Coimisiún i mbun comhairliúcháin iomchuí le linn a chuid oibre ullmhúcháin, lena n-áirítear ar leibhéal na saineolaithe, agus go ndéanfar na comhairliúcháin sin i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr⁷. Go háirithe, chun rannpháirtíocht chomhionann in ullmhú na ngníomhartha tarmligthe a áirithiú, faigheann Parlaimint na hEorpa agus an Chomhairle na doiciméid uile ag an am céanna leis na saineolaithe sna Ballstáit, agus bíonn rochtain chórasach ag a gcuid saineolaithe ar chruinnithe ghrúpaí saineolaithe an Choimisiúin a bhíonn ag déileáil le hullmhú na ngníomhartha tarmligthe.

⁷ IO L 123, 12.5.2016, lch. 1.

(24) Chun coinníollacha aonfhoirmeacha a áirithiú maidir le cur chun feidhme fhorálacha Threoir 2009/16/CE a mhéid a bhaineann le liosta na gCoinbhinsiún *faoina* raon feidhme, leis na ■ coinníollacha i ndáil le hIarscríbhinn VII a chur i bhfeidhm i dtaca le cigireachtaí méadaithe, le sraith aonfhoirmeach na dtreoirlínte agus nósanna imeachta sábháilteachta agus slándála, agus leis na ceanglais le haghaidh deimhnithe leictreonacha, ba cheart cumhachtaí cur chun feidhme a thabhairt don Choimisiún. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle⁸.

■

(25) I bhfianaise thimthriall faireacháin iomlán chuariteanna na Gníomhaireachta Eorpaí um Shábháilteacht Mhuirí (EMSA) ar Bhallstáit chun faireachán a dhéanamh ar chur chun feidhme Threoir 2009/16/CE, ba cheart don Choimisiún meastóireacht a dhéanamh ar chur chun feidhme na Treorach sin don chéad uair tráth nach déanaí ná 5 bliana tar éis dháta *trasuite* na Treorach leasaithí seo agus tuarascáil a thabhairt do Pharlaimint na hEorpa agus don Chomhairle maidir leis sin. Ba cheart do na Ballstáit oibriú i gcomhar leis an gCoimisiún chun an fhaisnéis uile is gá a bhailiú don mheastóireacht sin. ***Ba cheart meastóireachtaí ina dhiaidh sin a dhéanamh gach 5 bliana.***

⁸ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13).

(26) Ós rud é nach féidir leis na Ballstáit cuspóirí na Treorach seo a ghnóthú go leordhóthanach mar gheall ar chineál idirnáisiúnta an iompair mhuirí, agus, de bharr éifeachtaí gréasáin na mBallstát agus iad ag gníomhú le chéile, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú.

(27) *Chun nach gcuirfí ualach díréireach riaracháin ar Bhallstáit thalamhiata, ba cheart a cheadú do Bhallstáit den sórt sin, trí riail de minimis, maolú a dhéanamh ar an oibleagáid atá an Treoir seo a thrasú agus a chur chun feidhme, fad agus a chomhlíonann siad critéir áirithe.*

(28) Ba cheart, dá bhrí sin, Treoir 2009/16/CE a leasú dá réir sin,

TAR ÉIS AN TREOIR SEO A GHLACADH:

Airteagal 1

Leasuithe ar Threoir 2009/16/CE

Leasaítear Treoir 2009/16/CE mar a leanas:

(1) leasaítear Airteagal 2, an chéad mhír, mar a leanas:

(a) *leasaítear pointe 1 mar a leanas:*

(i) *cuirtear an méid seo a leanas in ionad phointe (d):*

‘(d) an Coinbhinsiún Idirnáisiúnta maidir le Caighdeán Oiliúna, Deimhniúcháin agus Faire do Mharaithe, 1978 (‘Coinbhinsiún STCW’);’;

(ii) cuirtear na pointí ■ seo a leanas leis:

‘(l) an Coinbhinsiún Idirnáisiúnta um Rialú agus Bainistiú Uisce Ballasta agus Dríodar Long, 2004 (‘Coinbhinsiún BWM’);

(m) Coinbhinsiún Idirnáisiúnta Nairobi maidir le Raiceanna a Bhaint, 2007 (‘Coinbhinsiún Nairobi’);

(n) Coinbhinsiún Idirnáisiúnta Hong Cong maidir le hAthchúrsáil Long ar Bhealach Sábháilte agus Neamhdhíobhálach don Chomhshaol, 2009 (‘Coinbhinsiún Hong Cong’ ■).’;

(b) scriostar pointe 3;

(c) *cuirtear an pointe seo a leanas isteach:*

‘8a. ciallaíonn ‘cigireacht’ fíorú ar bhail na loinge, a trealamh agus a criú, bunaithe ar na Coinbhinsiúin is infheidhme agus arna déanamh ag cigire. Ní suirbhé í an chigireacht chun deimhnithe reachtúla a eisiúint, a fhorhnuiniú nó a athnuachan, agus ní deimhniú í an tuarascáil chigireachta a leanann an chigireacht agus a sholáthraítear do mháistir na loinge;’;

(d) *cuirtear an méid seo a leanas in ionad phointí 11, 12 agus 13:*

‘11. ciallaíonn ‘cigireacht tosaigh’ cigireacht ar bord loinge arna déanamh ag cigire, lena n-áirítear ar a laghad na seiceálacha a cheanglaítear faoi Airteagal 13(1);

12. ciallaíonn ‘cigireacht níos mionsonraithe’ cigireacht lena n-áirítear na gnéithe de chigireacht tosaigh agus lena gcuirtear an long agus a trealamh agus a criú ina iomláine nó, de réir mar is iomchuí, cuid díobh sin, sna himthosca a shonraítear in Airteagal 13(3), faoi scrúdú domhain lena gcumhdaítear déanmhas, trealamh agus foirniú na loinge, na dálaí maireachtála agus oibre a bhaineann léi agus an méid a chomhlíontar nósanna imeachta oibríochtúla a dhéantar ar bord loinge;

13. ciallaíonn ‘cigireacht mhéadaithe’ cigireacht lena n-áirítear, ar a laghad, na nithe a liostaítear in Iarscríbhinn VII agus na gnéithe de chigireacht tosaigh. Féadfaidh cigireacht níos mionsonraithe a bheith ina chuid de chigireacht mhéadaithe má bhíonn forais shoiléire leis sin i gcomhréir le hAirteagal 13(3);’;

(e) *cuirtear an méid seo a leanas in ionad phointe 20:*

'20. ciallaíonn 'deimhniú reachtúil' deimhniú arna eisiúint ag Stát brataí nó thar a cheann i gcomhréir leis na Coinbhinsiún is infheidhme;'

2) leasaítear Airteagal 3 mar a leanas:

(a) cuirtear an méid seo a leanas in ionad mhíreanna 3 agus 4:

'3. Agus cigireacht á déanamh acu ar long a bhfuil bratach Stáit nach bhfuil ina pháirtí i gCoinbhinsiún ar foluain aici, áiritheoidh na Ballstáit nach gcaitear ar dhóigh níos fabhraí leis an long sin, ná lena criú, ná mar a chaitear le long a bhfuil bratach Stáit atá ina pháirtí sa Choinbhinsiún sin ar foluain aici. Beidh long den sórt sin faoi réir cigireacht níos mionsonraithe i gcomhréir leis na nósanna imeachta arna mbunú faoi Mheabhrán Comhthuisceana Pháras. Mar sin féin, long a bhfuil bratach Stáit nach bhfuil ina pháirtí in CLC 92, sa Choinbhinsiún um Ola Umair, 2001, nó i gCoinbhinsiún Nairobi ar foluain aici, ní bheidh sí faoi réir cigireacht níos mionsonraithe go huathoibríoch má tá, ag an long sin, an deimhniú ábhartha a d'eisigh Stát atá ina pháirtí sna coinbhinsiúin sin agus má chinneann an cigire a dhéanann an chigireacht nach gá cigireacht níos mionsonraithe a dhéanamh. Déanfar an cinneadh sin agus na cúiseanna leis sin a thairfeadh sa bhunachar sonraí cigireachta.

4. Eisiafar ó raon feidhme na Treorach seo soithí iascaireachta atá **níos giorra ná** 24 mhéadar **ar fad**, longa cogaidh, árthaí cúnata cabhlaigh, longa adhmaid den seandéanamh, longa rialtais a úsáidtear chun críoch neamhthráchtála agus luaimh phléisiúir nach bhfuil i mbun trádála. **Chun críocha na Treorach seo, déanfar fad soithigh iascaireachta a chinneadh i gcomhréir le Comhaontú Cape Town 2012 maidir le Cur Chun Feidhme Fhorálacha Phrótacal 1993 a bhaineann le Coinbhinsiún Idirnáisiúnta Torremolinos um Shábháilteacht Soithí Iascaireachta, 1977.**’;

(b) cuirtear an mhír [] seo a leanas isteach:

‘4a. [] Féadfaidh na Ballstáit cigireachtaí um rialú arna dhéanamh ag Stát an chalafoirt a dhéanamh ar shoithí iascaireachta atá [] 24 mhéadar ar fad **nó níos faide**. Féadfaidh an Coimisiún, **i gcomhar leis na Stáit is sínitheoirí le Meabhrán Comhthuisceana Pháras, treoirlínte a ghlacadh** lena mbunaítear na socrúithe mionsonraithe le haghaidh córas sonrath **comhthreomhar agus ar leithligh den sórt sin** um rialú arna dhéanamh ag Stát an chalafoirt le haghaidh na soithí iascaireachta **sin []** .’;

(3) in Airteagal 5, cuirtear an mhír seo ■ a leanas isteach:

‘2a. Ní chuirfear san áireamh, agus **gealltanais** cigireachtaí bliantúla na bpáirtithe i Meabhrán Comhthuisceana Pháras á ríomh, cigireachtaí a dhéanann Ballstát ar longa **atá thar líon atá 20 % níos mó ná líon ghealltanais cigireachta bliantúla an Bhallstáit sin**’;

(4) cuirtear an méid seo a leanas in ionad Airteagal 6:

‘Airteagal 6

Socrúithe mionsonraithe maidir leis an ngealltanais cigireachta a chomhlíonadh

1. Measfar, **mar sin féin**, maidir le Ballstát a mhainníonn na cigireachtaí a cheanglaítear faoi Airteagal 5(2), pointe (a), a dhéanamh, gur **chomhlíon** sé an ceanglas sin mura bhfuil an líon cigireachtaí a chaill sé thar 10 % de líon iomlán na long faoi Thosaíocht I a thug cuairt ar a chalafoirt agus ar a ancaireachtaí, gan beann ar a bpróifil riosca.

2. D'ainneoin chéatadán na gcigireachtaí a cailleadh dá dtagraítear i *mír 1*, tabharfaidh na Ballstáit tús áite *do* chigireacht a dhéanamh ar longa arb annamh, de réir na faisnéise a sholáthraítear sa bhunachar sonraí cigireachta, a gcuairt ar chalafoirt laistigh den Aontas.
3. D'ainneoin chéatadán na gcigireachtaí a cailleadh dá dtagraítear i *mír 1*, i gcás longa faoi Thosaíocht I a thugann cuairt ar ancaireachtaí, tabharfaidh na Ballstáit tús áite *do* chigireacht a dhéanamh ar longa a bhfuil próifíl ardriosca acu arb annamh, de réir na faisnéise a sholáthraítear sa bhunachar sonraí cigireachta, a gcuairt ar chalafoirt laistigh den Aontas.';

(5) in *Airteagal 7*, cuirtear an méid seo a leanas in ionad an teidil agus mhíreanna 1 agus 2:

'Airteagal 7

Socrúithe mionsonraithe le haghaidh gealltanans cigireachta cothrom ar fud an Aontais

1. *Maidir le Ballstát ina dtéann an líon iomlán cuairteanna ó longa faoi Thosaíocht I thar an sciar cigireachta dá dtagraítear in Airteagal 5(2), pointe (b), measfar go bhfuil a ghealltanans cigireachta bliantúil comhlionta aige má chomhfhreagraíonn an líon cigireachtaí a rinne an Ballstát sin, ar a laghad, dá sciar cigireachta dá dtagraítear in Airteagal 5(2), pointe (b), agus nach gcailleann an Ballstát sin níos mó ná 40 % den líon iomlán de longa faoi Thosaíocht I a thugann cuairt ar a chuid calafort nó ancaireachtaí.*

2. Ballstát ina bhfuil an líon iomlán cuairteanna ó longa faoi Thosaíocht I agus Tosaíocht II níos lú ná 150 % den sciar cigireachta dá dtagraítear in Airteagal 5(2), pointe (b), measfar *mar sin féin* go bhfuil a ghealltanas cigireachta bliantúil comhlíonta aige ■ má dhéanann an Ballstát sin cigireachtaí ar dhá thrian de na longa faoi Thosaíocht I agus faoi Thosaíocht II de líon iomlán na long faoi Thosaíocht I agus faoi Thosaíocht II a thugann cuairt ar a chuid calafort agus ancaireachtaí.’;

(6) leasaítear Airteagal 8 mar a leanas:

- (a) cuirtear an méid seo a leanas in ionad mhíreanna 1, 2 agus 3:

‘1. Féadfaidh Ballstát a chinneadh go gcuirfí cigireacht ar long faoi Thosaíocht I nó faoi Thosaíocht II siar in aon cheann de na himthosca seo a leanas:

- (a) dá bhféadfaí an chigireacht a dhéanamh le linn *aon chuairt eile* a thugann an long ar an mBallstát céanna laistigh de 15 lá *ón am imeachta iarbhír*, ar choinníoll nach dtugann an long cuairt ar aon chalafort eile laistigh den Aontas ná de réigiún Mheabhrán Comhthuisceana Pháras idir an dá linn, *cé is moite d’aon chalafoirt de chuid an Stáit brataí*;

- (b) dá bhféadfaí an chigireacht a dhéanamh i gcalafort cuarda eile laistigh den *Aontas* nó de réigiún Mheabhrán Comhthuisceana Pháras laistigh de 15 lá *ón am imeachta iarbhír*, ar choinníoll gur chomhaontaigh an Stát ina bhfuil calafort cuarda den sórt sin, roimh ré, an chigireacht a dhéanamh; *nó*
- (c) *dá bhféadfaí an chigireacht ar long, lena n-áirítear longa paisinéirí róró nó árthaí paisinéirí ardluais a oibrítear ar sheirbhís rialta, a dhéanamh sa chalafort cuarda céanna laistigh de 15 lá ón am imeachta iarbhír.*

I gcás ina gcinneann Ballstát cigireacht a chur siar de bhun na chéad fhomhíre, ní áireofar an chigireacht sin a cuireadh siar agus comhlíonadh ghealltanais cigireachta bliantúil an Bhallstáit sin dá dtagraítear in Airteagail 6 agus 7 á ríomh, má dhéantar an chigireacht a cuireadh siar a thairfeadh amhlaidh sa bhunachar sonraí cigireachta.

2. I gcás nach ndéantar cigireacht ar longa faoi Thosaíocht I nó faoi Thosaíocht II ar chúiseanna oibríochtúla, ní áireofar é sin mar chigireacht a cailleadh, ar choinníoll go ndéantar an chúis a bhí le gan an chigireacht a dhéanamh a thaifeadadh sa bhunachar sonraí cigireachta agus go bhfuil feidhm ag aon cheann de na himthosca eisceachtúla seo a leanas:
- (a) measann an t-údarás inniúil go gcruthófaí riosca, dá ndéanfaí an chigireacht, do shábháilteacht na gcigirí, na loinge nó a criú, nó don chalafort, nó don mhuirthimpeallacht;
 - (b) is san oíche, agus san oíche amháin, a thugann an long cuairt ar an gcalafort ■ ; *nó*
 - (c) *tá fad na cuairte loinge róghearr chun an chigireacht a dhéanamh go sásúil.*

I gcás ina bhfuil feidhm ag na himthosca dá dtagraítear faoi phointe (b), déanfaidh na Ballstáit na bearta is gá chun a áirithiú go ndéanfar cigireacht, de réir mar is iomchuí, ar longa a thugann cuairt go rialta san oíche.

3. *I gcás nach ndéantar cigireacht ar long ar ancaire, ní áireofar é sin mar chigireacht a cailleadh más rud é gur fíor an méid seo a leanas ina leith:*

- (a) déantar cigireacht, i gcomhréir le hIarscríbhinn I, ar an long i gcalafort nó in ancaireacht eile laistigh den Aontas nó de réigiún Mheabhrán Comhthuisceana Pháras laistigh de 15 lá ón am imeachta iarbhír;*
- (b) is san oíche, agus san oíche amháin, a thugann an long cuairt ar an gcalafort nó tá fad na cuairte sin róghearr le go bhféadfaí an chigireacht a dhéanamh go sásúil, agus déantar an chúis a bhí le gan an chigireacht a dhéanamh a thairfeadh sa bhunachar sonraí cigireachta; nó*
- (c) measann an t-údarás inniúil go gcruthófaí riosca, dá ndéanfaí an chigireacht, do shábháilteacht na gcigirí, na loinge nó a criú, nó don chalafort nó don mhuirthimpeallacht, agus déantar an chúis a bhí le gan an chigireacht a dhéanamh a thairfeadh sa bhunachar sonraí cigireachta.’;*

(b) cuirtear an mhír seo a leanas leis:

- ‘4. Mura ndéantar cigireacht mar gheall ar imthosca urghnácha gan choinne, ní áireofar é sin mar chigireacht a cailleadh agus déanfar an chúis a bhí le gan an chigireacht a dhéanamh a thairfeadh sa bhunachar sonraí cigireachta. Tabharfar údar cuí leis na himthosca sin agus tuairisceofar don Choimisiún iad.’;*

I

- (7) scriostar Airteagal 9;
- (8) in Airteagal 10, cuirtear an méid seo a leanas in ionad mhíreanna 2 agus 3:

‘2. Cinnfear an phróifil riosca atá ag long trí na paraiméadair riosca chineálacha, stairiúla agus chomhshaoil seo a leanas a chur le chéile:

(a) *Paraiméadair chineálacha*

Beidh paraiméadair chineálacha bunaithe ar an gcineál, ar an aois, ar an mbratach, ar na heagraíochtaí aitheanta atá i gceist agus ar fheidhmíocht na cuideachta i gcomhréir le hIarscríbhinn I, Cuid I.1, agus Iarscríbhinn II.

(b) *Paraiméadair stairiúla*

Beidh paraiméadair stairiúla bunaithe ar líon na n-easnamh agus na gcoinneálacha le linn tréimhse áirithe i gcomhréir le hIarscríbhinn I, Cuid I.2, agus Iarscríbhinn II.

(c) Paraiméadair chomhshaoil

Beidh paraiméadair chomhshaoil bunaithe ar líon na n-easnamh a bhaineann le Marpol 73/78, AFS 2001, Coinbhinsiún BWM, CLC 92, an Coinbhinsiún um Ola Umair, 2001, *Coinbhinsiún* Nairobi agus Coinbhinsiún Hong Cong i gcomhréir le hIarscríbhinn I, Cuid I.3, agus Iarscríbhinn II.

3. *Glacfaidh an Coimisiún gníomhartha cur chun feidhme lena leagtar síos an mhodheolaíocht maidir le measúnú a dhéanamh ar pharaiméadair riosca chineálacha a bhaineann, go háirithe, le critéir a bhaineann leis an Stát brataí agus le critéir a bhaineann le feidhmíocht na gcuideachtaí arna nglacadh faoi Mheabhrán Comhthuisceana Pháras in 2019 lenar bunaíodh liostaí ardfeidhmíochta, meánfeidhmíochta agus ísealfeidhmíochta. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 31(2).’;*

(9) *leasaítear Airteagal 13 mar a leanas:*

(a) *i mír 1, cuirtear an méid seo a leanas in ionad phointe (c):*

‘(c) go mbeidh an cigire sásta leis an mbail fhoriomlán, lena n-áirítear sláinteachas, chomh maith le bail an tseomra innill agus bail na cóiríochta.’;

(b) *scriostar mír 2;*

(10) **█** *leasaítear Airteagal 14 mar a leanas:*

(a) *cuirtear an méid seo a leanas in ionad mhír 1:*

‘1. Tá na catagóirí long seo a leanas incháilithe le haghaidh cigireacht mhéadaithe i gcomhréir le hIarscríbhinn I, Cuid II, 3A agus 3B:

(a) *longa lena ngabhann próifíl ardriosca;*

(b) *longa paisinéirí, bulc-iompróirí, tancaeir ola, iompróirí gáis, tancaeir substaintí leachtacha urchóideacha nó tancaeir ceimiceán, atá níos sine ná 12 bhliain;*

- (c) *longa lena ngabhann próifil ardriosca nó longa paisinéirí, bulc-iompróirí, tancaeir ola, iompróirí gáis, tancaeir substaintí leachtacha urchóideacha nó tancaeir ceimiceán, atá níos sine ná 12 bhliain, i gcásanna ina bhfuil tosca forcheannasacha nó tosca gan choinne;*
- (d) *longa atá faoi réir cigireachta tar éis ordú um dhiúltú rochtana arna eisiúint i gcomhréir le hAirteagal 16 agus Airteagal 21(4).’;*

(b) scriostar mír 3;

(c) cuirtear an méid seo a leanas in ionad mhír 4:

‘4. Beirt chigirí um rialú arna dhéanamh ag Stát an chalafoirt *ar a laghad, a mhéid is féidir*, a dhéanfaidh cigireacht mhéadaithe. *Mura bhfuil sé sin indéanta, déanfar na cúiseanna a thaifeadadh go cuí sa bhunachar sonraí cigireachta.* Leagtar amach in Iarscríbhinn VII raon feidhme na cigireachta méadaithe, lena n-áirítear na réimsí riosca atá le cumhdach. Glacfaidh an Coimisiún gníomhartha cur chun feidhme lena leagtar síos socruithe mionsonraithe chun coinníollacha aonfhoirmeacha a áirithiú maidir le hIarscríbhinn VII a chur i bhfeidhm. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 31(2).’; ■

(11) ■ leasaítear Airteagal 14a mar a leanas:

(a) cuirtear an méid seo a leanas in ionad mhír 4:

‘4. Ní bheidh feidhm ag Airteagal 11, pointe (a), ná Airteagal 14 maidir le longa paisinéirí róró agus le hárthaí paisinéirí ardluais ar sheirbhís rialta a ndéantar cigireacht orthu faoin Airteagal seo.’;

(b) cuirtear an mhír seo a leanas isteach:

‘4a. Áiritheoidh oibreoir nó máistir na loinge go gcuirfear dóthain ama ar fáil sa sceideal oibriúcháin chun gur féidir na cigireachtaí dá bhforáiltear i bpointe 1.1 agus i bpointe 2(a) d’Iarscríbhinn XVII a dhéanamh.’;

(12) leasaítear Airteagal 16 mar a leanas:

(a) cuirtear an méid seo a leanas in ionad mhíreanna 1 go 4:

‘1. Diúltóidh Ballstát rochtain a thabhairt ar a chalafoirt agus ar a ancaireachtaí d’aon long:

- (a) a bhfuil bratach Stáit ar foluain aici atá *ar* an liosta ísealfheidhmíochta, arna ghlacadh i gcomhréir le Meabhrán Comhthuisceana Pháras ar bhonn na faisnéise arna taifeadadh sa bhunachar sonraí cigireachta agus arna foilsiú ag an gCoimisiún go bliantúil, agus a cuireadh faoi choinneáil níos mó ná dhá uair laistigh de na 36 mhí roimhe sin i gcalafort nó in ancaireacht de chuid Ballstáit nó de chuid Stát is sínitheoir le Meabhrán Comhthuisceana Pháras; nó
- (b) a bhfuil bratach Stáit ar foluain aici atá *ar* an liosta ardfeidhmíochta nó meánfeidhmíochta, arna ghlacadh i gcomhréir le Meabhrán Comhthuisceana Pháras ar bhonn na faisnéise arna taifeadadh sa bhunachar sonraí cigireachta agus arna foilsiú ag an gCoimisiún go bliantúil, agus a cuireadh faoi choinneáil níos mó ná dhá uair laistigh de na 24 mhí roimhe sin i gcalafort nó in ancaireacht de chuid Ballstáit nó de chuid Stát is sínitheoir le Meabhrán Comhthuisceana Pháras. ■

Ní bheidh feidhm ag an gcéad fhomhír den mhír seo sna cásanna dá dtagraítear in Airteagal 21(6).

Beidh an diúltú rochtana infheidhme a luaithe a fhágfaidh an long an calafort nó an ancaireacht ina raibh sí faoi réir coinneála don tríú huair agus ina ndearnadh ordú um dhiúltú rochtana a eisiúint.

- 2. Ní chuirfear deireadh leis an ordú um dhiúltú rochtana go dtí go mbeidh 3 mhí caite ó dháta eisiúna an ordaithe sin agus go dtí go gcomhlíonfar na coinníollacha a liostaítear i bpointí 3 go 6 d'Iarscríbhinn VIII.***

Má tá an long faoi réir an dara hordú um dhiúltú rochtana, ní chuirfear deireadh leis an ordú um dhiúltú rochtana sin ach amháin tar éis tréimhse 12 mhí.

3. Má choinnítear long ina dhiaidh sin i gcalafort nó in ancaireacht *de chuid Ballstáit nó de chuid Stát is sínitheoir le Meabhrán Comhthuisceana Pháras*, beidh de thoradh air sin go ndiúltófar rochtain don long ar aon chalafort nó ar aon ancaireacht laistigh den Aontas. Féadfar deireadh a chur le tríú hordú um dhiúltú rochtana den sórt sin nuair a bheidh tréimhse 24 mhí caite ó dháta eisiúna an ordaithe sin, ach é sin ar choinníoll gur fíor an méid seo a leanas ina leith:

(a) tá ar foluain ag an long bratach Stáit nach bhfuil a ráta coinneála ar an liosta ísealfheidhmíochta ná ar an liosta meánfheidhmíochta;

(b) eisióinn eagraíocht nó eagraíochtaí a aithnítear faoi Rialachán (CE) Uimh. 391/2009 ó Pharlaimint na hEorpa agus ón gComhairle* deimhnithe reachtúla agus aicmiúcháin na loinge;

- (c) tá an long á bainistiú ag cuideachta a mbaineann ardfheidhmíocht léi de réir Chuid I.1 d'Iarscríbhinn I; agus
- (d) comhlíontar na coinníollacha a liostaítear i bpointí 3 go 6 d'Iarscríbhinn VIII.

Aon long nach gcomhlíonann na critéir a liostaítear sa chéad fhomhír, tar éis tréimhse 24 mhí a bheith caite ó dháta eisiúna an ordaithe um dhiúltú rochtana, diúltófar rochtain ar bhonn buan dóibh ar gach calafort nó gach ancaireacht laistigh den Aontas.

4. Má choinnítear long ina dhiaidh sin tar éis an tríú hordú um dhiúltú rochtana, i gcalafort nó in ancaireacht laistigh den Aontas, ar long í a bhfuil bratach Stáit ar foluain aici **atá ar** an liosta meánfheidhmíochta nó ar an liosta ísealfheidhmíochta, beidh de thoradh air sin go ndiúltófar rochtain ar bhonn buan don long ar aon chalafort nó ar aon ancaireacht laistigh den Aontas.

* Rialachán (CE) Uimh. 391/2009 ó Pharlaimint na hEorpa agus ón gComhairle an 23 Aibreán 2009 maidir le rialacha comhchoiteanna agus caighdeáin chomhchoiteanna d'eagraíochtaí cigireachta agus suirbhéireachta loinge (IO L 131, 28.5.2009, lch. 11.);

(b) **cuirtear na míreanna** seo a leanas isteach:

‘4a. ■ Maidir le long a bhfuil bratach Stáit ar foluain aici **atá ar** an liosta ardfheidhmíochta, **ar diúltaíodh rochtain di trí huairé nó níos mó agus atá** faoi choinneáil i gcalafort nó in ancaireacht **de chuid an Aontais** tráth a céad **chigireachta san Aontas ón tríú diúltú rochtana sin nó ó aon diúltú rochtana ina dhiaidh sin:**

(a) **diúltófar rochtain di ar aon chalafort nó ar aon ancaireacht de chuid an Aontais go ceann tréimhse 24 mhí, má eisíonn eagraíocht nó eagraíochtaí a aithnítear faoi Rialachán (CE) Uimh. 391/2009 deimhnithe reachtúla agus aicmiúcháin na loinge;**

(b) diúltófar rochtain ar bhonn buan di ar aon chalafort nó ar aon ancaireacht de chuid an Aontais mura n-eisíonn eagraíocht nó eagraíochtaí a aithnítear faoi Rialachán (CE) Uimh. 391/2009 deimhnithe reachtúla agus aicmiúcháin na loinge.

4b. Déanfar tréimhsí um dhiúltú rochtana le haghaidh coinneálacha iolracha a fhadú 12 mhí i gcásanna ina bhfuil feidhm ag beart um dhiúltú rochtana i gcomhréir le hAirteagal 21(4).’;

I

(13) in Airteagal 17, cuirtear an méid seo a leanas in ionad na chéad mhíre:

‘Ar chríochnú cigireachta, tarraingeoidh an cigire suas tuarascáil chigireachta i gcomhréir le hIarscríbhinn IX. Tabharfar cóip den tuarascáil chigireachta do mháistir na loinge.’;

(14) in Airteagal 19(4), cuirtear an méid seo a leanas in ionad na chéad fhomhíre:

‘4. Má léirítear leis an gcigireacht nach bhfuil an long feistithe le taifeadán sonraí turais atá ag feidhmiú, agus más rud é go bhfuil úsáid taifeadáin den sórt sin éigeantach i gcomhréir le Treoir 2002/59/CE ó Pharlaimint na hEorpa agus ón gComhairle*, áiritheoidh an t-údarás inniúil go gcuirfear an long faoi choinneáil.

* Treoir 2002/59/CE ó Pharlaimint na hEorpa agus ón gComhairle an 27 Meitheamh 2002 lena mbunaítear córas faireacháin agus faisnéise um thrácht árthaí de chuid an Chomhphobail agus lena n-aisghairtear Treoir 93/75/CEE ón gComhairle (IO L 208, 5.8.2002, lch. 10).’;

(15) *in Airteagal 20, cuirtear an méid seo a leanas in ionad mhír 1:*

‘1. Beidh ceart achomhairc ag úinéir nó oibreoir loinge, nó ag ionadaí an úinéara nó an oibreora sa Bhallstát, in aghaidh aon choinneáil nó aon dhiúltú rochtana ó thaobh an údaráis inniúil. Ní bheidh achomharc ina shiocair le coinneáil nó diúltú rochtana a chur ar fionraí.’;

(16) **█** *leasaítear* Airteagal 21 *mar a leanas:*

(a) cuirtear an méid seo a leanas in ionad mhír 4:

‘4. Déanfaidh na Ballstáit bearta chun a áirithiú go ndiúltófar rochtain ar gach calafort agus ar gach ancaireacht laistigh den Aontas do longa dá dtagraítear i mír 1 den Airteagal seo **agus do longa faoi choinneáil dá dtagraítear in Airteagal 19(2), ar longa iad:**

(a) a ghabhann chun farraige gan na coinníollacha sin a chomhlíonadh a chinn údarás inniúil aon Bhallstáit i gcalafort na cigireachta; nó

- (b) a gceadaítear dóibh gabháil chun farraige ar choinníoll go gcomhlíonann siad ceanglais infheidhme na gCoinbhinsiún trí chuairt a thabhairt ina dhiaidh sin *ar* an gclós deisiúcháin a sonraíodh de bhun mhír 1 den Airteagal seo, ach a mhainníonn an coinníoll sin a chomhlíonadh.

Tiocfaidh an t-ordú um dhiúltú rochtana chun bheith infheidhme ó dháta a eisiúna. *Ní chuirfear deireadh leis an ordú um dhiúltú rochtana go dtí go mbeidh tréimhse 12 mhí caite ó dháta eisiúna an ordaithe sin agus go dtí go gcomhlíonfar na coinníollacha a liostaítear i bpointí 3 go 6 d'Iarscríbhinn VIII.;*

- (b) *cuirtear an méid seo a leanas in ionad mhíreanna 5 agus 6:*

'5. Sna himthosca dá dtagraítear i mír 4, an chéad fhomhír, pointe (a), cuirfidh údarás inniúil an Bhallstáit ina bhfuarthas amach go raibh an long lochtach údaráis inniúla na mBallstát eile go léir ar a n-airdeall láithreach.

Sna himthosca dá dtagraítear i mír 4, an chéad fhomhír, pointe (b), cuirfidh údarás inniúil an Bhallstáit ina bhfuil an clós deisiúcháin suite údarás an Bhallstáit ina bhfuarthas amach go raibh an long lochtach ar an eolas faoi cé acu ar tháinig an long isteach. Nuair a thagann údarás inniúil an Bhallstáit ina bhfuarthas amach go raibh an long lochtach ar an eolas nár thug an long cuairt ar an gclós deisiúcháin sin, cuirfidh sé údaráis inniúla na mBallstát eile go léir ar a n-airdeall láithreach.

Sna himthosca dá dtagraítear i mír 4, an chéad fhomhír, pointe (b), mura bhfuil an clós deisiúcháin a léirítear de bhun mhír 1 i mBallstát agus más rud é go dtagann údarás inniúil an Bhallstáit ina bhfuarthas amach go raibh an long lochtach ar an eolas nár thug an long cuairt

ar an gclós deisiúcháin sin, cuirfidh sé údaráis inniúla na mBallstát eile go léir ar a n-airdeall.

Sula ndiúltóidh sé rochtain a thabhairt don long, féadfaidh an Ballstát iarraidh dul i mbun comhairliúcháin le córas riaracháin Stát brataí na loinge lena mbaineann.

6. *De mhaolú ar mhír 4, maidir le rochtain a bheith ag long dá dtagraítear sa mhír sin, féadfaidh údarás ábhartha Stát an chalafoirt cead a thabhairt do long rochtain a bheith aici ar chalafort sonrath nó ar ancaireacht shonrach an Stáit sin i gcás force majeure nó cúinsí forcheannasacha sábháilteachta, chun an riosca truaillithe a laghdú nó a íoslaghdú nó chun easnaimh a cheartú i gcomhréir le mír 1, ar choinníoll go bhfuil bearta leordhóthanacha curtha chun feidhme ag úinéir, oibreoir nó máistir na loinge chun a áirithiú gur féidir leis an long lena mbaineann dul isteach sa chalafort sin nó san ancaireacht sin go sábháilte chun sástachta údarás inniúil an Bhallstáit sin.’;*

(17) in Airteagal 22, cuirtear an méid seo a leanas in ionad mhír 7:

‘7. I gcomhar leis na Ballstáit agus leis na Stáit is sínitheoirí le ***Meabhrán Comhthuisceana Pháras, agus bunaithe ar an saineolas agus ar an taithí a fuarthas ar leibhéal na mBallstát san Aontas agus faoi Mheabhrán Comhthuisceana Pháras***, forbróidh **an Coimisiún** clár oiliúna gairmiúil ***chun tacú*** leis an oiliúint ***agus an measúnú a dhéanfaidh na Ballstáit ar inniúlachtaí na gcigirí*** um rialú arna dhéanamh ag Stát an chalafoirt ***chun beartas oiliúna Mheabhrán Comhthuisceana Pháras a chomhlánú, d’fhonn cleachtais*** a bhaineann le rialú arna dhéanamh ag Stát an chalafoirt ***a chomhchuibhiú.*** **█**

Déanfaidh an Coimisiún, ar bhonn leanúnach, i gcomhar leis na Ballstáit ***agus leis na Stáit is sínitheoirí le Meabhrán Comhthuisceana Pháras***, riachtanais oiliúna nua a shainaithint agus freagairt orthu, trí ***ionchur*** a sholáthar chun curaclaim, siollabais agus ábhar an chláir oiliúna do chigirí a leasú, go háirithe maidir le ***dúshlán nua sábháilteachta muirí a bhaineann le saincheisteanna comhshaoil, sóisialta agus saothair agus teicneolaíochtaí nua, chomh maith le hionchur a sholáthar i ndáil leis na hoibleagáidí breise a eascraíonn as na hionstraimí ábhartha.*** **█**

(18) in Airteagal 23, cuirtear an méid seo a leanas in ionad mhíreanna 1 agus 2:

- ‘1. Déanfaidh na Ballstáit bearta iomchuí chun a áirithiú, i dtaca le píolótaí dá gcuid a bhíonn i mbun longa a chur i mbeart nó a bhaint as beart, nó a bhíonn ar fostú ar longa atá ar a mbealach go calafort nó faoi bhealach laistigh de Bhallstát, go gcuirfidh na píolótaí sin údarás inniúil an Stáit calafoirt nó an Stáit cósta ar an eolas láithreach, de réir mar is iomchuí, aon uair a gheobhaidh siad amach, agus iad i mbun a ngnáthdhualgas, go bhfuil aimhrialtachtaí dealraitheacha ann a d’fhéadfadh **an tsábháilteacht, lena n-áirítear seoladh sábháilte na loinge, ■** nó sábháilteacht na maraithe ar bord, a chur i mbaol nó a d’fhéadfadh a bheith ina mbagairt don mhuirthimpeallacht.
2. Má fhaigheann údarás calafoirt nó comhlachtaí calafoirt amach, agus é i mbun a ghnáthdhualgas, go bhfuil aimhrialtachtaí dealraitheacha ag baint le long atá ina chalafort a d’fhéadfadh an tsábháilteacht, lena n-áirítear **seoladh sábháilte na loinge nó sábháilteacht na maraithe ar bord, a chur i mbaol nó a d’fhéadfadh a bheith ina mbagairt** don mhuirthimpeallacht, cuirfidh an t-údarás nó an comhlacht sin údarás inniúil an Stáit calafoirt ar an eolas láithreach.’;

(19) in Airteagal 24, cuirtear an méid seo a leanas in ionad mhíreanna 2 agus 3:

‘2. Maidir le faisnéis faoi am teachta iarbhír agus am imeachta iarbhír aon loinge a thugann cuairt ar chalafoirt nó ar ancaireachtaí, maille le haitheantóir de chuid an chalafoirt nó na hancaireachta lena mbaineann, déanfaidh na Ballstáit na bearta iomchuí chun a áirithiú go n-aistreofar an fhaisnéis sin laistigh de 3 uair an chloig *ón am teachta agus am imeachta, faoi seach*, chuig an mbunachar sonraí cigireachta trí bhíthin chóras an Aontais um malartú faisnéise muirí, ‘SafeSeaNet’, dá dtagraítear in Airteagal 3, pointe (s), de Threoir 2002/59/CE. A luaithe agus a bheidh faisnéis den sórt sin aistriithe acu chuig an mbunachar sonraí cigireachta trí bhíthin SafeSeaNet, bíonn na Ballstáit díolmhaithe ó shonraí a sholáthar i gcomhréir le pointe 1.2 agus pointe 2(a) agus (b) d’Iarscríbhinn XIV a ghabhann leis an Treoir seo.

3. Áiritheoidh na Ballstáit, i dtaca leis an bhfaisnéis a bhaineann leis na cigireachtaí a dhéantar i gcomhréir leis an Treoir seo, go n-aistreofar an fhaisnéis sin chuig an mbunachar sonraí cigireachta chomh luath agus a chríochnófar an tuarascáil chigireachta nó a chuirfear deireadh leis an ordú coinneála.

Laistigh de 72 uair an chloig, áiritheoidh na Ballstáit go ndéanfar an fhaisnéis a aistrítear chuig an mbunachar sonraí cigireachta a bhailíochtú chun críocha a foilsithe. Déanfar an tuarascáil chigireachta a bhailíochtú, sula n-aistreofar chuig an mbunachar sonraí í, más indéanta ag cigire um rialú arna dhéanamh ag Stát an chalafoirt *nó fostaí cuí-údaraithe eile de chuid an údaráis inniúil* nach raibh mar chuid den fhoireann a rinne an chigireacht an tuarascáil chigireachta a bhailíochtú.’;

(20) cuirtear an t-airteagal ■ seo a leanas isteach:

‘Airteagal 24a

Deimhnithe leictreonacha

Déanfaidh an Coimisiún, i ndlúthchomhar leis na Ballstáit, gníomhartha cur chun feidhme a ghlacadh lena leagtar síos na sonraíochtaí feidhmiúla agus teicniúla d’uirlis bhailíochtaithe ■ le haghaidh deimhnithe *reachtúla* leictreonacha ■ . Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 31(2).’; ■

■

(21) cuirtear an méid seo a leanas in ionad Airteagal 25:

‘Airteagal 25

Malartú faisnéise agus comhoibriú

Áiritheoidh gach Ballstát go ndéanfaidh a chuid údarás calafoirt nó a chuid comhlachtaí calafoirt, agus aon údarás nó comhlacht ábhartha eile dá chuid, na cineálacha faisnéise seo a leanas atá ina seilbh a sholáthar don údarás inniúil:

- (a) faisnéis a bhaineann le longa a mhainnigh fógra a thabhairt faoi aon fhaisnéis i gcomhréir le ceanglais na Treorach seo, Threoir 2002/59/CE agus Threoir (AE) 2019/883 ó Pharlaimint na hEorpa agus ón gComhairle*, agus, más iomchuí, Rialachán (CE) Uimh. 725/2004;

- (b) faisnéis a bhaineann le longa a ghabh chun farraige gan Airteagal 7 de Threoir (AE) 2019/883 a bheith comhlíonta acu;
- (c) faisnéis a bhaineann le longa ar diúltaíodh cead isteach dóibh nó a díbríodh amach as calafort ar chúiseanna slándála;
- (d) faisnéis faoi aimhrialtachtaí dealraitheacha arna dtuairisciú i gcomhréir le hAirteagal 23.

* Treoir (AE) 2019/883 ó Pharlaimint na hEorpa agus ón gComhairle an 17 Aibreán 2019 maidir le saoráidí glactha calafoirt don seachadadh dramhaíola ó longa (IO L 151, 7.6.2019, lch. 116).’;

(22) cuirtear an méid seo a leanas in ionad Airteagal 30:

‘Airteagal 30

Faireachán a dhéanamh ar an gcomhlíonadh ag na Ballstáit agus ar a bhfeidhmíocht

Chun a áirithiú go gcuirfear an Treoir seo chun feidhme go héifeachtach agus chun faireachán a dhéanamh ar fheidhmiú ginearálta chóras an Aontais i dtaca leis an rialú arna dhéanamh ag Stát an chalafoirt i gcomhréir le Rialachán (CE) Uimh. 1406/2002, baileoidh an Coimisiún an fhaisnéis is gá agus tabharfaidh sé cuairteanna ar na Ballstáit.

Déanfaidh gach Ballstát córas bainistithe cáilíochta a fhorbairt, a chur chun feidhme
█ agus a chothabháil lena gcumhdaítear codanna oibríochtúla ghníomhaíochtaí a gcórais riaracháin a bhaineann le Stát an chalafoirt *a bhfuil baint aige go díreach le cigireachtaí*. Déanfar an córas bainistithe cáilíochta *sin* a dheimhniú i gcomhréir leis na caighdeáin cháilíochta idirnáisiúnta is infheidhme faoin ... [*90 mí ó dháta theacht i bhfeidhm na Treorach leasaithe seo*].’;

(23) █ cuirtear an méid seo a leanas in ionad Airteagal 30a:

‘Airteagal 30a

Gníomhartha tarmligthe

Glacfaidh an Coimisiún gníomhartha tarmligthe i gcomhréir le hAirteagal 30b, chun Airteagal 2, pointe (1), a leasú maidir le liosta na gCoinbhinsiún a leagtar amach ann, a luaithe a ghlacfar Coinbhinsiún den sórt sin mar ionstraim ábhartha faoi Mheabhrán Comhthuisceana Pháras, agus chun Iarscríbhinn VI a leasú chun liosta na nósanna imeachta, na *dtreoirlínte, na dtreoracha agus na gclárán*, a bhaineann le rialú arna dhéanamh ag Stát an chalafoirt, arna ghlacadh faoi Mheabhrán Comhthuisceana Pháras agus a leagtar amach san Iarscríbhinn sin a thabhairt cothrom le dáta nó chun gnéithe nua a chur leis.’;

I

(24) *cuirtear an t-airteagal seo a leanas isteach:*

‘Airteagal 31a

Leasuithe ar na Coinbhinsiúin

Beidh feidhm ag na leasuithe ar na Coinbhinsiúin gan dochar don nós imeachta seiceála comhréireachta a leagtar amach in Airteagal 5 de Rialachán (CE)

Uimh. 2099/2002.’;

(25) *cuirtear an méid seo a leanas in ionad Airteagal 33:*

‘Airteagal 33

Gníomhartha cur chun feidhme

*Agus na gníomhartha cur chun feidhme dá dtagraítear in Airteagail **10(3)**, 14(4), 15(4), 18a(7), 23(5), **24a(1)** agus Airteagal 27, an dara mír, á nglacadh acu i gcomhréir leis na nósanna imeachta dá dtagraítear in Airteagal 31(2), glacfaidh an Coimisiún cúram ar leith chun **a áirithiú** go gcuirfear san áireamh sna gníomhartha sin an saineolas agus an taithí a fuarthas leis an gcóras cigireachta san Aontas agus go gcuirfidh na gníomhartha sin le saineolas Mheabhrán Comhthuisceana Pháras.’;*

(26) cuirtear an méid seo a leanas in ionad Airteagal 35:

‘Airteagal 35

Tuarascáil cur chun feidhme

Faoin ... [90 mí ó dháta *theacht i bhfeidhm* na Treorach leasaithí] agus gach 5 bliana ina dhiaidh sin, cuirfidh an Coimisiún tuarascáil faoi bhráid Pharlaimint na hEorpa agus na Comhairle maidir le cur chun feidhme agus comhlíonadh na Treorach seo. Ar bhonn na tuarascála sin, cinnfidh an Coimisiún an gá togra reachtach a thíolacadh chun an Treoir seo a leasú nó le haghaidh tuilleadh gníomhartha dlí sa réimse sin.

Tar éis do IMO an t-athbhreithniú ar a tháscaire déine carbóin a thabhairt i gcrích, déanfaidh an Coimisiún measúnú ar oiriúnacht an táscaire déine carbóin sin mar pharaiméadar comhshaoil a úsáidtear chun an phróifíl riosca atá ag long a chinneadh faoin Treoir seo. Ar bhonn an mheasúnaithe sin, breithneoidh an Coimisiún an ndéanfaidh sé togra reachtach a thíolacadh, de réir mar is iomchuí.’;

- (27) cuirtear an téacs a leagtar amach in Iarscríbhinn I a ghabhann leis an Treoir seo in ionad Iarscríbhinn I;
- (28) cuirtear an téacs a leagtar amach in Iarscríbhinn II a ghabhann leis an Treoir seo in ionad Iarscríbhinn II;
- (29) scriostar Iarscríbhinn III;
- (30) cuirtear an téacs a leagtar amach in Iarscríbhinn III a ghabhann leis an Treoir seo in ionad Iarscríbhinn IV;
- (31) cuirtear an téacs a leagtar amach in Iarscríbhinn IV a ghabhann leis an Treoir seo in ionad Iarscríbhinn VI;
- (32) cuirtear an téacs a leagtar amach in Iarscríbhinn V a ghabhann leis an Treoir seo in ionad Iarscríbhinn VIII;
- (33) ***cuirtear an téacs a leagtar amach in Iarscríbhinn VI a ghabhann leis an Treoir seo in ionad Iarscríbhinn XII.***

Airteagal 2

Trasú

1. Na forálacha reachtaíochta, rialúcháin agus riaracháin is gá chun an Treoir seo a chomhlíonadh, déanfaidh na Ballstáit iad a ghlacadh agus a fhoilsiú faoin ... [**30 mí** ó dháta theacht i bhfeidhm na Treorach leasaithe seo]. Cuirfidh siad an Coimisiún ar an eolas faoi sin láithreach.

Nuair a ghlacfaidh na Ballstáit na forálacha sin, beidh tagairt iontu don Treoir seo nó beidh an tagairt ag gabháil leo tráth a bhfoilsithe oifigiúil. Leagfaidh na Ballstáit síos an bealach a ndéanfar tagairtí den sórt sin.

2. Déanfaidh na Ballstáit téacs phríomhforálacha an dlí náisiúnta a ghlacfaidh siad sa réimse a chumhdaítear leis an Treoir seo a chur in iúl don Choimisiún.

3. De mhaolú ar mhír 1, ***Ballstáit nach bhfuil calafoirt farraige acu agus atá in ann a léiriú gur longa a chumhdaítear leis an Treoir seo iad níos lú ná 5 % den líon iomlán soithí aonair a thugann cuairt ar bhonn bliantúil ag a gcalafoirt abhann le linn na 3 bliana roimhe sin, féadfaidh siad maolú a dhéanamh ar an oibleagáid an Treoir seo a thrasú agus a chur chun feidhme.***

Airteagal 3

Teacht i bhfeidhm

Tiocfaidh an Treoir seo i bhfeidhm an 20^ú lá tar éis lá a fhoilsithe in *Iris Oifigiúil an Aontais Eorpaigh*.

Airteagal 4

Seolaithe

Is chuig na Ballstáit a dhírítear an Treoir seo.

Arna déanamh in/sa ...,

Thar ceann Pharlaimint na hEorpa

An tUachtarán

Thar ceann na Comhairle

An tUachtarán

IARSCRÍBHINN I

‘IARSCRÍBHINN I

GNÉITHE DE CHÓRAS AN AONTAIS MAIDIR LE CIGEARACHT ARNA DÉANAMH AG STÁT AN CHALAFÓIRT

(dá dtagraítear in Airteagal 5)

Áireofar na gnéithe seo a leanas i gCóras an Aontais maidir le Cigireacht arna déanamh ag Stát an Chalafoirt:

I. Próifil riosca loinge

Cinnfear an phróifil riosca atá ag long trí na paraiméadair riosca chineálacha, stairiúla agus chomhshaoil seo a leanas a chur le chéile.

1. Paraiméadair chineálacha

(a) Cineál loinge

Measfar gurb airde an riosca a bhíonn ag gabháil le longa paisinéirí, ***bulc-iompróirí, tancaeir ola, iompróirí gáis, tancaeir substaintí leachtacha urchóideacha nó tancaeir ceimiceán.***

(b) Aois na loinge

Measfar gurb airde an riosca a bhíonn ag gabháil le longa is sine ná 12 bhliain.

(c) Feidhmíocht an Stáit brataí

- (i) Measfar gurb airde an riosca a bhíonn ag gabháil le longa a bhfuil bratach Stáit ar foluain acu a bhfuil ráta coinneála ard acu laistigh den Aontas agus de réigiún Mheabhrán Comhthuisceana Pháras.
- (ii) Measfar gurb ísle an riosca a bhíonn ag gabháil le longa a bhfuil bratach Stáit ar foluain acu a bhfuil ráta coinneála íseal acu laistigh den Aontas agus de réigiún Mheabhrán Comhthuisceana Pháras.
- (iii) Measfar gurb ísle an riosca a bhíonn ag gabháil le longa a bhfuil bratach Stáit ar foluain acu a dhaingnigh na hionstraimí éigeantacha de chuid IMO *agus EIS* a liostaítear in Airteagal 2, pointe (1). ■

■

(d) Eagraíochtaí aitheanta

- (i) Measfar gurb airde an riosca a bhíonn ag gabháil le longa a bhfuil deimhnithe faighte acu ó eagraíochtaí aitheanta a mbaineann leibhéal íseal nó an-íseal feidhmíochta leo i dtaca lena rátaí coinneála laistigh den Aontas agus de réigiún Mheabhrán Comhthuisceana Pháras.

- (ii) Measfar gurb ísle an riosca a bhíonn ag gabháil le longa a bhfuil deimhnithe faighte acu ó eagraíochtaí aitheanta a mbaineann leibhéal ard feidhmíochta leo i dtaca lena rátaí coinneála laistigh den Aontas agus de réigiún Mheabhrán Comhthuisceana Pháras.
 - (iii) Longa a bhfuil deimhnithe acu a d'eisigh eagraíochtaí a aithnítear i gcomhréir le Rialachán (CE) Uimh. 391/2009.
- (e) Feidhmíocht na gcuideachtaí
- (i) Measfar gurb airde an riosca a bhíonn ag gabháil le longa de chuid cuideachta a mbaineann feidhmíocht íseal nó an-íseal léi, feidhmíocht a chinntear de réir easnamh a cuid long agus de réir a cuid rátaí coinneála laistigh den Aontas agus de réigiún Mheabhrán Comhthuisceana Pháras.
 - (ii) Measfar gurb ísle an riosca a bhíonn ag gabháil le longa de chuid cuideachta a mbaineann ardfheidhmíocht léi, feidhmíocht a chinntear de réir easnamh a cuid long agus de réir a cuid rátaí coinneála laistigh den Aontas agus de réigiún Mheabhrán Comhthuisceana Pháras.

2. Paraiméadair stairiúla

- (i) Measfar gurb airde an riosca a bhíonn ag gabháil le longa a cuireadh faoi choinneáil níos mó ná aon uair amháin.
- (ii) Measfar gurb ísle an riosca a bhíonn ag gabháil le longa a bhfuarthas, le linn cigireacht nó cigireachtaí a rinneadh orthu sa tréimhse dá dtagraítear in Iarscríbhinn II, gur lú easnaimh a bhain leo ná an líon easnamh dá dtagraítear in Iarscríbhinn II.
- (iii) Measfar gurb ísle an riosca a bhíonn ag gabháil le longa nár cuireadh faoi choinneáil le linn na tréimhse dá dtagraítear in Iarscríbhinn II.

Chun na próifílí riosca loinge seo a leanas a chinneadh, déanfar na paraiméadair riosca a chur le chéile trí úsáid a bhaint as ualú lena léirítear an tionchar coibhneasta a bhíonn ag gach paraiméadar ar leith ar an riosca foriomlán a ghabhann leis an long:


- ardriosca,

- gnáthriosca,
- ísealriosca.

Agus na próifilí riosca sin á gcinneadh, tabharfar breis tábhachta do na paraiméadair a bhaineann le cineál na loinge, feidhmíocht an Stáit brataí, eagraíochtaí aitheanta agus feidhmíocht na cuideachta.

3. Paraiméadair chomhshaoil



Measfar ***gurb airde*** an riosca a bhíonn ag gabháil le longa a bhfuarthas, le linn cigireacht nó cigireachtaí a rinneadh orthu sa tréimhse dá dtagraítear in Iarscríbhinn II, ***gur mó*** easnamh a bhain leo ná an líon easnamh a bhaineann le MARPOL 73/78, AFS 2001, Coinbhinsiún BWM, CLC 92, an Coinbhinsiún um Ola Umair, 2001, ***Coinbhinsiún*** Nairobi ***agus*** Coinbhinsiún Hong Cong dá dtagraítear in Iarscríbhinn II. 

II. Cigireacht a dhéanamh ar longa

1. Cigireachtaí tréimhsiúla

Déanfar cigireachtaí tréimhsiúla de réir eatraimh réamhshocraithe. Cinnfear a minicíocht de réir na próifíle riosca loinge. An t-eatramh idir cigireachtaí tréimhsiúla a dhéantar ar longa ardriosca, ní rachaidh sé thar 6 mhí. An t-eatramh idir cigireachtaí tréimhsiúla a dhéantar ar longa lena mbaineann próifílí riosca eile, rachaidh sé i bhfaide de réir mar is ísle an riosca.

Déanfaidh na Ballstáit cigireacht thréimhsiúil orthu seo a leanas:

- Aon long lena mbaineann próifíl ardriosca nach ndearnadh aon chigireacht uirthi i gcalafort ná in ancaireacht laistigh den Aontas ná de réigiún Mheabhrán Comhthuisceana Pháras le 6 mhí. Longa ardriosca, bíonn siad incháilithe le haghaidh cigireachta ón 5^ú mí amach.***

- *Aon long lena mbaineann próifil ghnáthriosca nach ndearnadh cigireacht uirthi i gcalafort ná in ancaireacht laistigh den Aontas ná de réigiún Mheabhrán Comhthuisceana Pháras le 12 mhí. Longa gnáthriosca, bíonn siad incháilithe le haghaidh cigireachta ón 10^ú mí amach.*
- *Aon long lena mbaineann próifil ísealriosca nach ndearnadh cigireacht uirthi i gcalafort ná in ancaireacht laistigh den Aontas ná de réigiún Mheabhrán Comhthuisceana Pháras le 36 mhí. Longa ísealriosca, bíonn siad incháilithe le haghaidh cigireachta ón 24^ú mí amach.*

2. Cigireachtaí breise

Longa lena mbaineann na tosca forcheannasacha nó gan choinne seo a leanas, bíonn siad faoi réir cigireacht a bheith déanta orthu gan beann ar fhad na tréimhse ó rinneadh an chigireacht thréimhsiúil dheireanach orthu. Mar sin féin, fágfar faoi bhreithiúnas gairmiúil an chigire é a chinneadh an gá tabhairt faoi chigireacht bhreise den sórt sin i gcás tosca gan choinne.

2A. Tosca forcheannasacha

Longa lena mbaineann na tosca forcheannasacha seo a leanas, déanfar cigireacht orthu gan beann ar fhad na tréimhse ó rinneadh an chigireacht thréimhsiúil dheireanach orthu:

- *Longa a cuireadh ar fionraí nó a aistarraingíodh ón aicme lena mbaineann siad, ar chúiseanna sábháilteachta, ó rinneadh an chigireacht dheireanach orthu laistigh den Aontas nó de réigiún Mheabhrán Comhthuisceana Pháras.*
- *Longa a bhí ina n-ábhar do thuairisc nó d'fhógra ó Bhallstát eile.*
- *Longa nach féidir a shainaithint sa bhunachar sonraí cigireachta.*
- *Longa:*
 - *ar bhain imbhualadh dóibh, a chuaigh ar talamh nó a fágadh ar talamh tirim agus iad ar a mbealach go dtí an calafort;*
 - *ar líomhnaíodh ina leith gur sháraigh siad na forálacha maidir le scaoileadh amach substaintí díobhálacha nó eisilteach díobhálach;*

- *a rinne ionramháil ar bhealach guagach nó neamhshábháilte a d’fhág nár cloíodh le bearta maidir le slite loingsithe, a ghlac IMO, ná le cleachtais agus nósanna imeachta sábháilte loingseoireachta;*
- *ar cuireadh toirmeasc orthu roimhe sin (an chéad chigireacht tar éis deireadh a bheith curtha leis an ordú um dhiúltú rochtana); nó*
- *a raibh baint acu le teagmhas tromchúiseach, go háirithe mórdhóiteán ar bord, cliseadh innill agus timpistí marfacha.*

2B. Tosca gan choinne

Longa lena mbaineann na tosca gan choinne seo a leanas, déanfar cigireacht orthu gan beann ar fhad na tréimhse ó rinneadh an chigireacht thréimhsiúil dheireanach orthu. Fágтар an cinneadh maidir leis an gcigireacht bhreise sin a dhéanamh, nó gan a dhéanamh, faoi bhreithiúnas gairmiúil an údaráis inniúil:

- *Longa a bhfuil deimhnithe ar bord a d’eisigh eagraíochtaí a bhí aitheanta roimhe sin ar baineadh díobh an t-aitheantas sin ón uair a rinneadh an chigireacht dheireanach laistigh den Aontas nó de réigiún Mheabhrán Comhthuisceana Pháras.*

- *Longa a ndearna píolótaí, údaráis calafoirt nó comhlachtaí calafoirt a thuirisciú ina dtaobh, i gcomhréir le hAirteagal 23 den Treoir seo, go raibh aimhrialtachtaí dealraitheacha ag baint leo a d'fhéadfadh seoladh sábháilte na loinge a chur i mbaol nó a d'fhéadfadh a bheith ina mbagairt don timpeallacht mhuirí. Féadfar a áireamh sna tuarascálacha sin faisnéis ó Sheirbhísí um Thrácht Árthaí faoi loingseoireacht long.*
- *Longa nár chomhlíon na ceanglais ábhartha maidir le fógra a thabhairt dá dtagraítear i dTreoir (AE) 2019/883.*
- *Longa a bhí ina n-ábhar tuairisce nó gearáin, lena n-áirítear gearán ar tír, a rinne máistir, ball criú, nó aon duine nó eagraíocht a bhfuil spéis dhlísteanach aige nó aici in oibriú sábháilte na loinge, sna dálaí maireachtála agus oibre ar bord nó i gcosc an truaillithe, ach amháin i gcás ina measann an Ballstát lena mbaineann gur follas an tuairisc nó an gearán a bheith gan bhunús.*

- *Longa a tuairiscíodh mar gheall ar easnamh ISM atá fós gan réiteach (3 mhí tar éis an t-easnamh a eisiúint).*
- *Longa a cuireadh faoi choinneáil níos mó ná 3 mhí roimhe sin cheana.*
- *Longa ar tuairiscíodh ina dtaobh go raibh fadhbanna ag baint lena lasta, go háirithe i gcás lastaí d'ábhar urchóideach nó contúirteach.*
- *Longa a rinneadh a oibriú ar bhealach a chruthaigh contúirt do dhaoine, do mhaoin nó don chomhshaol.*
- *Longa a bhfuarthas faisnéis ina dtaobh, ó fhoinse iontaofa, a thug le fios nach ionann a bparaiméadair riosca agus na paraiméadair a taifeadh, agus gurb airde arís, dá réir sin, an leibhéal riosca a bhaineann leo.*
- *Longa ar aontaíodh ina leith plean gníomhaíochta chun easnaimh dá dtagraítear in Airteagal 19(2a) a chur ina gceart, ach nach bhfuil seiceáil déanta fós ag an gcigire chun féachaint ar cuireadh an plean sin chun feidhme.*

3. *Scéim roghnúcháin*

3A. *Déanfar cigireacht ar longa faoi Thosaíocht I mar a leanas:*

(a) *Déanfar cigireacht mhéadaithe orthu seo a leanas:*

- *aon long lena mbaineann próifíl ardriosca nach ndearnadh cigireacht uirthi le 6 mhí;*
- *aon long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán, atá níos sine ná 12 bhliain, lena mbaineann próifíl ghnáthriosca, nach ndearnadh cigireacht uirthi ná air le 12 mhí.*

(b) *Déanfar cigireacht tosaigh nó cigireacht níos mionsonraithe, de réir mar is iomchuí, orthu seo a leanas:*

- *aon long nach long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán í, atá níos sine ná 12 bhliain, lena mbaineann próifíl ghnáthriosca, nach ndearnadh cigireacht uirthi le 12 mhí.*

(c) I gcás toisc fhorcheannasach:

- *déanfar cigireacht níos mionsonraithe nó cigireacht mhéadaithe, ag brath ar bhreithiúnas gairmiúil an chigire, ar aon long lena mbaineann próifíl ardríosca agus ar aon long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán, atá níos sine ná 12 bhliain;*
- *déanfar cigireacht níos mionsonraithe ar aon long nach long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán í, atá níos sine ná 12 bhliain;*
- *déanfar cigireacht mhéadaithe ar aon long sa chéad chigireacht tar éis deireadh a bheith curtha le hordú um dhiúltú rochtana.*

3B. I gcás ina gcinneann an t-údarás inniúil cigireacht a dhéanamh ar long faoi Thosaíocht II, beidh feidhm ag an méid seo a leanas:

(a) Déanfar cigireacht mhéadaithe orthu seo a leanas:

- aon long lena mbaineann próifíl ardriosca nach ndearnadh cigireacht uirthi le 5 mhí;**
- aon long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán, atá níos sine ná 12 bhliain, lena mbaineann próifíl ghnáthriosca agus nach ndearnadh cigireacht uirthi nó air le 10 mí; nó**
- aon long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán, atá níos sine ná 12 bhliain, lena mbaineann próifíl ísealriosca agus nach ndearnadh cigireacht uirthi nó air le 24 mhí.**

(b) Déanfar cigireacht tosaigh nó cigireacht níos mionsonraithe, de réir mar is iomchuí, orthu seo a leanas:

- *aon long nach long paisinéirí, bulc-iompróir, tancaer ola, iompróir gás, tancaer substaintí leachtacha urchóideacha nó tancaer ceimiceán í, atá níos sine ná 12 bhliain, lena mbaineann próifíl ghnáthriosca, nach ndearnadh cigireacht uirthi le 10 mí; nó*
- *aon long nach long paisinéirí, bulc-iompróir, tancaer ola, iompróir gás, tancaer substaintí leachtacha urchóideacha nó tancaer ceimiceán í, atá níos sine ná 12 bhliain, lena mbaineann próifíl ísealriosca, nach ndearnadh cigireacht uirthi le 24 mhí.*

(c) I gcás toisc gan choinne:

- *déanfar cigireacht níos mionsonraithe nó cigireacht mhéadaithe, ag brath ar bhreithiúnas gairmiúil an chigire, ar aon long lena mbaineann próifíl ardriosca nó aon long paisinéirí, bulc-iompróir, tancaer ola, iompróir gás, tancaer substaintí leachtacha urchóideacha nó tancaer ceimiceán, atá níos sine ná 12 bhliain;*
- *déanfar cigireacht níos mionsonraithe ar aon long nach long paisinéirí, bulc-iompróir, tancaer ola, iompróir gás, tancaer substaintí leachtacha urchóideacha nó tancaer ceimiceán í, atá níos sine ná 12 bhliain.?*

IARSCRÍBHINN II

‘IARSCRÍBHINN II

‘DEARADH NA PRÓIFÍLE RIOSCA LOINGE

(dá dtagraítear in Airteagal 10(2))

| | | Próifil | | | | | |
|--------------------------|----------------------|--|-----------------|---|------------------------|------|-----|
| | | Long Ardriosca (LAR) | | Long Gnáthriosca (LGR) | Long Ísealriosca (LÍR) | | |
| Paraiméadair chineálacha | | Critéir | Pointí ualaithe | Critéir | Critéir | | |
| 1 | Cineál loinge | <i>Long paisinéirí, bulc-iompróir, tancaer ola, iompróir gáis, tancaer substaintí leachtacha urchóideacha nó tancaer ceimiceán</i> | 1 | ní long ardriosca ná long ísealriosca í | Gach cineál | | |
| 2 | Aois na loinge | gach cineál > 12 bhliain | 1 | | Gach aois | | |
| 3a | Bratach | Feidhmíocht íseal | 2 | | Ardfeidhmíocht | | |
| 3b | | Daingníodh na hionstraimí go léir de chuid IMO/ <i>EIS</i> a liostaítear in Airteagal 2 | - | | - | Fíor | |
| 4a | Eagraíocht aitheanta | Feidhmíocht | A | | - | - | Ard |
| | | | M | | - | - | - |
| | | | Í | Íseal | 1 | - | |
| | | | AÍ | An-íseal | - | - | |
| 4b | | Aitheanta ag an Aontas | - | - | Fíor | | |

| | | | | | | |
|--------------------------|--|-------------|--------------|--------------------------------|---|--|
| 5 | Cuideachta | Feidhmíocht | A | - | - | Ard |
| | | | M | - | - | - |
| | | | Í | Íseal | 2 | - |
| | | | Aí | An-íseal | | - |
| Paraiméadair stairiúla | | | | | | |
| 6 | An líon easnamh a cuireadh ar taifead le linn gach cigireacht ar leith laistigh de 36 mhí roimhe sin | | Easnamh | >6 i gceann de na cigireachtaí | 1 | ≤ 5 i ngach cigireacht aonair (agus cigireacht amháin, ar a laghad, arna déanamh sa 36 mhí roimhe sin) |
| 7 | Líon na gcoinneálacha le 36 mhí anuas | | Coinneálacha | ≥ 2 choinneáil | 1 | Níor cuireadh ceann ar bith faoi choinneáil |
| Paraiméadair chomhshaoil | | | | | | |
| 8 | Líon na n-easnamh a bhaineann le Marpol 73/78, AFS 2001, Coinbhinsiún BWM, CLC 92, an Coinbhinsiún um Ola Umair, 2001, Coinbhinsiún Nairobi agus Coinbhinsiún Hong Cong a cuireadh ar taifead le linn gach cigireacht le 36 mhí anuas | | Easnamh | >2 i gceann de na cigireachtaí | 1 | |

Is ionann LAR agus longa a chomhlíonann critéir ar cothrom le 5 pointe ualúcháin, nó níos mó sin, a luach iomlán. Is ionann LÍR agus longa a chomhlíonann critéir uile na bParaiméadar riosca íseal.

Is ionann LGR agus longa nach longa LAR ná LÍR iad⁷.

IARSCRÍBHINN III

‘IARSCRÍBHINN IV

LIOSTA DE DHEIMHNITHE AGUS DE DHOICIMÉID

(dá dtagraítear in Airteagal 13(1))

Liosta de na deimhnithe agus de na doiciméid ar cheart, a mhéid is infheidhme, iad a sheiceáil ar a laghad le linn na cigireachta (de réir mar is iomchuí):

1. Deimhniú Idirnáisiúnta um Thonnáiste;
2. Na tuarascálacha ar chigireachtaí um rialú arna dhéanamh ag Stát an chalafoirt roimhe seo;
3. Deimhniú Sábháilteachta Loinge Paisinéirí (SOLAS 1974, rialachán I/12);
4. Deimhniú Sábháilteachta um Dhéanmhas Lastloinge (SOLAS 1974, rialachán I/12);
5. Deimhniú Sábháilteachta um Threalamh Lastloinge (SOLAS 1974, rialachán I/12);
6. Deimhniú Sábháilteachta um Raidió Lastloinge (SOLAS 1974, rialachán I/12);

7. Deimhniú Sábháilteachta Lastloinge (SOLAS 1974, rialachán I/12);
8. Deimhniú Díolúine (SOLAS 1974, rialachán I/12);
9. Doiciméad um Fhoirniú Sábháilte Íosta (SOLAS 1974, rialachán V/14.2);
10. Deimhniú Ualachlíne Idirnáisiúnta (LL 66, Airteagal 16.1);
11. Deimhniú Díolúine Ualachlíne Idirnáisiúnta (LL 66, Airteagal 16.2);
12. Deimhniú Idirnáisiúnta um Chosc ar Thruailliú le hOla (MARPOL Iarscríbhinn I, rialachán 7.1);
13. Deimhniú Idirnáisiúnta um Chosc ar Thruailliú i dtaca le Substaintí Leachtacha Urchóideacha a Iompar ina mBulc (MARPOL, Iarscríbhinn II, rialachán 9.1);
14. Deimhniú Idirnáisiúnta um Chosc ar Thruailliú le Camras (ISPPC) (MARPOL, Iarscríbhinn IV, rialachán 5.1, MEPC.1/Circ.408);
15. Deimhniú Idirnáisiúnta um Chosc ar Thruailliú le hOla (IAPPC) (MARPOL, Iarscríbhinn VI, rialachán 6.1);

16. Deimhniú Idirnáisiúnta um Éifeachtúlacht Fuinnimh (MARPOL, Iarscríbhinn VI, rialachán 6);
17. Deimhniú Idirnáisiúnta um Bainistiú Uisce Ballasta (IBWMC) (Coinbhinsiún BWMC, Airteagal 9.1(a) agus rialachán E-2);
18. Deimhniú Idirnáisiúnta um Chórais Frithsmálaithe (Deimhniú IAFS) (AFS 2001, Iarscríbhinn 4, rialachán 2);
19. Dearbhú maidir le AFS (AFS 2001, Iarscríbhinn 4, rialachán 5);
20. Deimhniú Idirnáisiúnta um Shlándáil Long (ISSC) nó Deimhniú Eatramhach Idirnáisiúnta um Shlándáil Long (an Cód ISPS, cuid A/19 agus foscscríbhinní);
21. Deimhnithe le haghaidh máistrí, oifigeach nó rátálacha arna n-eisiúint i gcomhréir leis an gCoinbhinsiún Idirnáisiúnta maidir le Caighdeáin Oilíúna, Deimhniúcháin agus Faire do Mharaithe (Coinbhinsiún STCW, Airteagal VI, rialachán I/2, agus Cód STCW, cuid A-I/2);

22. Cóip den Doiciméad Comhlíontachta nó cóip den Doiciméad Eatramhach Comhlíontachta arna eisiúint i gcomhréir leis an gCód Bainistithe Idirnáisiúnta um Oibriú Sábháilte Long agus um Thruailliú a Chosc (DoC) Cód ISM (SOLAS 1974, rialachán IX/4.2, Cód ISM, míreanna 13 agus 14);
23. Deimhniú Bainistithe Sábháilteachta nó Deimhniú Eatramhach Bainistithe Sábháilteachta arna eisiúint i gcomhréir leis an gCód Bainistithe Idirnáisiúnta um Oibriú Sábháilte Long agus um Thruailliú a Chosc (SMC) (SOLAS 1974, rialachán IX/4.3, Cód ISM, míreanna 13 agus 14);
24. Deimhniú Idirnáisiúnta um Oiriúnacht le haghaidh Gáis Leachtaithe a Iompar ina mBulc, nó an Deimhniú um Oiriúnacht le haghaidh Gáis Leachtaithe a Iompar ina mBulc, nó cibé acu is iomchuí (Cód IGC, rialachán 1.5.4, nó Cód GC, rialachán 1.6);
25. Deimhniú Idirnáisiúnta um Oiriúnacht le haghaidh Ceimiceáin Chontúirteacha a Iompar ina mBulc, nó an Deimhniú um Oiriúnacht le haghaidh Ceimiceáin Chontúirteacha a Iompar ina mBulc, nó cibé acu is iomchuí (Cód IBC, rialachán 1.45.4, agus Cód BCH, rialachán 1.6.3);

26. Deimhniú Oiriúnachta INF (Cód Idirnáisiúnta um Iompar Sábháilte Breosla Núicléach Ionradaithe Pacáistithe, Plútóiniam agus Dramhaíolacha Radaighníomhach Ardleibhéil ar Bord Long) (SOLAS 1974, rialachán VII/16, agus Cód INF, rialachán 1.3);
27. Deimhniú árachais, nó aon urrús airgeadais eile, i dtaca le dliteanas sibhialta i leith damáiste de dheasca truailliú le hola (CLC 92, Airteagal VII.2);
28. Deimhniú árachais, nó aon urrús airgeadais eile, i dtaca le dliteanas sibhialta maidir le damáiste de dheasca truailliú le hola umair (an Coinbhinsiún um Ola Umair, 2001, Airteagal 7.2);
29. Deimhniú Árachais nó Slándála Airgeadais eile i leith Dliteanais maidir le Raiceanna a Bhaint (Coinbhinsiún Nairobi, Airteagal 12);
30. Deimhniú Sábháilteachta Árthaí Ardluais agus Cead chun Árthaí Ardluais a Oibriú (SOLAS 1974, rialachán X/3.2 agus Cód Sábháilteachta Idirnáisiúnta le haghaidh Árthaí Ardluais 94/00, rialacháin 1.8.1 agus 1.9);
31. Doiciméad comhlíontachta i dtaca leis na ceanglais speisialta a leagtar ar longa a iompraíonn earraí contúirteacha (SOLAS 1974, rialachán II-2/19.4);

32. Doiciméad údarúcháin maidir le gráin a iompar agus lámhleabhar um luchtú grán (SOLAS 1974, rialachán VI/9; Cód Idirnáisiúnta um Iompar Sábháilte Grán i mBulc, cuid 3);
33. Ráiteas Comhlíonta um an Scéim um Bailmheasúnú (CAS), Tuarascáil Deiridh agus Taifead Athbhreithnithe CAS (Marpol 73/78, Iarscríbhinn I, rialacháin 20 agus 21; rún MEPC.94(46), arna leasú le rúin MEPC.99 (48), MEPC.112 (50), MEPC.131(53), MEPC.155(55) agus MEPC.236(65);
34. Taifead Achoimre Leanúnach (SOLAS 1974, rialachán XI-1/5);
35. Leabhar Taifid Ola, cuid I agus cuid II (Marpol 73/78, Iarscríbhinn I, rialacháin 17 agus 36);
36. Leabhar Taifid Lasta (Marpol 73/78, Iarscríbhinn II, rialachán 15);
37. Leabhar Taifid Bruscair, cuid I agus cuid II (Marpol 73/78, Iarscríbhinn V, rialachán 10.3);

38. Plean Bainistithe Dramhaíola (Marpol 73/78, Iarscríbhinn V, rialachán 10; rún MEPC.220 (63));
39. Logleabhar agus taifeadtaí ar leibhéal agus staid air/as inneall díosail mhuirí (Marpol 73/78, Iarscríbhinn VI, rialachán 13.5.3);
40. Logleabhar le haghaidh athrú ola breosla (Marpol 73/78, Iarscríbhinn VI, rialachán 14.6);
41. Leabhar Taifid Substaintí ídithe Ózóin (Marpol 73/78, Iarscríbhinn VI, rialachán 12.6);
42. Leabhar Taifid Uisce Ballasta (BWRB) (BWMC Airteagal 9.1 (b) agus rialachán B-2);
43. Córais fosaithe múchta dóiteáin gáis – Deimhniú Díolúine um spásanna lasta agus aon liosta lastaí (SOLAS 1974, rialachán II-2/10.7.1.4);
44. Lastliosta nó plean stuála d'earraí contúirteacha (SOLAS 1974, rialacháin VII/4 agus VII/7-2; Marpol 73/78, Iarscríbhinn III, rialachán 54);
45. I gcás tancaeir ola, taifead ón muiristear ballasta deireanach den chóras faireacháin agus rialaithe le haghaidh scaoileadh amach ola (Marpol 73/78, Iarscríbhinn I, rialachán 31.2);

46. Plean comhair um Chuardach agus Tarrtháil le haghaidh longa paisinéirí a bhíonn i mbun trádála ar bhealaí seasta (SOLAS 1974, rialachán V/7.3);
47. I gcás longa paisinéirí, Liosta na dteorainneacha oibríochtúla (SOLAS 1974, rialachán V/30.2);
48. Cairteacha loingseoireachta agus foilseacháin mhuirí (SOLAS 1974, rialacháin V/19.2.1.4 agus V/27);
49. Taifid d'uireanta sosa agus tábla de na socruithe oibre ar bord loinge (Cód STCW, cuid A-VIII/1.5 agus 1.7, Coinbhinsiún EIS Uimh. 180, Airteagail 5.7 agus 8.1, agus MLC 2006, Caighdeán A.2.3.10 agus A.2.3.12);
50. Deimhniú um oibreachas muirí
51. Dearbhú comhlíontachta maidir le hoibreachas muirí, codanna I agus II;
52. Fianaise ar spásanna innealra neamhfhreastalaithe (UMS) (SOLAS 1974, rialachán II-I/46.3);
53. Deimhnithe a cheanglaítear le Treoir 2009/20/CE ó Pharlaimint na hEorpa agus ón gComhairle*;
54. Deimhnithe a cheanglaítear le Rialachán (CE) Uimh. 392/2009 ó Pharlaimint na hEorpa agus ón gComhairle**;

55. Deimhniú maidir le fardal na n-ábhar guaiseach nó ráiteas maidir le comhlíonadh de réir mar is infheidhme de bhun Rialachán (AE) Uimh. 1257/2013 ó Pharlaimint na hEorpa agus ón gComhairle***;
56. Doiciméad comhlíontachta arna eisiúint faoi Rialachán (AE) 2015/757 ó Pharlaimint na hEorpa agus ón gComhairle****.

* Treoir 2009/20/CE ó Pharlaimint na hEorpa agus ón gComhairle an 23 Aibreán 2009 maidir le hárachas úinéirí long ar éilimh mhuirí (IO L 131, 28.5.2009, lch. 128).

** Rialachán (CE) Uimh. 392/2009 ó Pharlaimint na hEorpa agus ón gComhairle an 23 Aibreán 2009 maidir le dliteanas iompróirí paisinéirí de mhuir i gcás tionóiscí (IO L 131, 28.5.2009, lch. 24).

*** Rialachán (AE) Uimh. 1257/2013 ó Pharlaimint na hEorpa agus ón gComhairle an 20 Samhain 2013 maidir le hathchúrsáil long agus lena leasaítear Rialachán (CE) Uimh. 1013/2006 agus Treoir 2009/16/CE (IO L 330, 10.12.2013, lch. 1).

**** Rialachán (AE) 2015/757 ó Pharlaimint na hEorpa agus ón gComhairle an 29 Aibreán 2015 maidir le faireachán, tuairisciú agus fíorú a dhéanamh ar astaíochtaí dé-ocsaíde carbóin ó mhuirompar, agus lena leasaítear Treoir 2009/16/CE (IO L 123, 19.5.2015, lch. 55).².

IARSCRÍBHINN IV

‘IARSCRÍBHINN VI

NÓSANNA IMEACHTA MAIDIR LE LONGA A RIALÚ

(dá dtagraítear in Airteagal 15(1))

Na teoracha *teicniúla uile agus na ciorcláin uile arna n-eisiúint faoi Mheabhrán Comhthuisceana* Pháras, sa leagan díobh atá cothrom le dáta:

Teoracha teicniúla ón gcoiste um rialú arna dhéanamh ag Stát an Chalafoirt (PSCC)

- PSCC41-2008-07 Cód Dea-chleachtais
- PSCC53-2020-08 Sainmhínte agus Giorrúcháin

Meabhrán Ginearálta Comhthuisceana Pháras

- PSCC54-2021-03 Cineál cigireachta

– *PSCC56-2023-06* Coinneáil agus Beart a Rinneadh

– *PSCC56-2023-04* Foirmeacha samplacha

– PSCC52-2019-05 Rialú oibríochtúil

– PSS43-2010-11 Díolúintí an Stáit brataí



– PSCC51-*2018-13* Stop a chur le hoibríocht

– PSCC49-2016-11 Tástáil lándorchaithe

– PSCC53-2020-06 Diúltú Rochtana (Toirmeasc)

– PSCC50-2017-12 Bulc-iompróirí/tancaeir ola struchtúir

– PSCC43-2010-06 Duga Tirim

- PSCC53-2020-11 Cead a thabhairt faoi choinne turas amháin chuig clós deisiúcháin le haghaidh easnaimh ‘damáiste de thaisme’

Coinbhinsiún SOLAS

- ***PSCC56-2023-05*** Cód ISM
- PSCC54-2021-02 Cód ISPS
- PSCC51-2018-12 ECDIS
- PSCC43-2010-32 VDR (Taifeadáin Dátaí Turas)
- PSCC43-2010-09 Bileoga Sonraí Sábháilteachta Ábhar
- PSCC43-2010-21 GMDSS
- PSCC44-2011-16 Crúcaí scaoilte lóid Báid Tarrthála

- PSCC45-2012-10 Cobhsaíocht damáiste ar thancaeir
- PSCC55-2022-05 Aithint agus rianú fadraoin
- PSCC43-2010-28 Tomhais tiúis ESP/CAS
- PSCC43-2010-29 Tomhas tiúis
- PSCC51-2018-11 Cód Polach
- PSCC55-2022-02 Cód IGF

Coinbhinsiún MARPOL

- PSCC46-2013-18 MARPOL Iarscríbhinn I OWS
- PSCC43-2010-39 MARPOL Iarscríbhinn II Stialadh
- PSCC47-2014-08 MARPOL Iarscríbhinn III IMDG

- PSCC55-2022-07 MARPOL Iarscríbhinn IV Camras
- PSCC52-2019-07 MARPOL Iarscríbhinn V Dramhaíl
- PSCC56-2023-07 MARPOL Iarscríbhinn VI Truailliú Aeir
- PSCC43-2010-38 Níochán amhola
- PSCC44-2011-20 MARPOL Imscrúdú

An Coinbhinsiún Idirnáisiúnta ar Ualachlínte

- PSCC54-2021-06 an Coinbhinsiún Idirnáisiúnta ar Ualachlínte

Coinbhinsiún AFS

- PSCC47-2014-13 Córais Frithsmálaithe

An Coinbhinsiún um Ola Umair



- *PSCC56-2023-02 Coinbhinsiún a bhaineann le Dlíteanas Airgeadais*

Deimhniú Maraithe agus Foirnithe

- *PSCC56-2023-08* Deimhniú Maraithe agus Foirnithe (STCW, MLC agus SOLAS)

An Coinbhinsiún um Bainistiú Uisce Ballasta

- PSCC51-2018-09 An Coinbhinsiún um Bainistiú Uisce Ballasta

Coinbhinsiún na hEagraíochta Idirnáisiúnta Saothair

- PSCC52-2019-10 An Coinbhinsiún Oibreachais Mhuirí, 2006
- PSCC53-2020-14 Uaireanta Oibre nó Scíthe agus oiriúnacht le haghaidh dualgais’.

IARSCRÍBHINN V

‘IARSCRÍBHINN VIII

FORÁLACHA I dTACA LE ROCHTAIN AR CHALAFÓIRT AGUS AR ANCAIREACHTAÍ LAISTIGH DEN AONTAS A DHIÚLTÚ

(dá dtagraítear in Airteagal 16 *agus in Airteagal 21(4)*)

- (1) Má chomhlíontar na coinníollacha a bhfuil tuairisc orthu in Airteagal 16(1), cuirfidh údarás inniúil an chalafoirt sin ina gcuirtear an long faoi choinneáil den tríú huair máistir na loinge ar an eolas i scríbhinn go n-eiseofar ordú um dhiúltú rochtana a thiocfaidh chun bheith infheidhme díreach tar éis imeacht na loinge as an gcalafort. Tiocfaidh an t-ordú um dhiúltú rochtana chun bheith infheidhme díreach tar éis imeacht na loinge as an gcalafort tar éis na heasnaimh as ar tháinig an choinneáil a leigheas.
- (2) Cuirfidh an t-údarás inniúil cóip den ordú um dhiúltú rochtana chuig córas riaracháin an Stáit brataí, chuig an eagraíocht aitheanta lena mbaineann, chuig na Ballstáit eile, agus chuig sínitheoirí Mheabhrán Comhthuisceana Pháras, chuig an gCoimisiún agus chuig Rúnaíocht Mheabhrán Comhthuisceana Pháras. Tabharfaidh an t-údarás inniúil an bunachar sonraí cigireachta cothrom le dáta freisin, gan mhoill, le faisnéis faoin diúltú rochtana.

- (3) Chun go gcuirfí deireadh leis an ordú um dhiúltú rochtana, ní mór d'úinéir nó oibreoir na loinge iarraidh fhoirmiúil a chur chuig údarás inniúil an Bhallstáit a d'fhorchuir an t-ordú um dhiúltú rochtana. Ní mór doiciméad ó chóras riaracháin an Stáit brataí a bheith ag gabháil le iarraidh den sórt sin, ar doiciméad é a eisíodh tar éis cuairt ar bord a bheith tugtha ag suirbhéir atá cuí-údaraithe ag córas riaracháin an Stáit brataí, agus ar doiciméad é lena léirítear go gcomhlíonann an long forálacha infheidhme na gCoinbhinsiún ina n-iomláine. Soláthróidh córas riaracháin an Stáit brataí fianaise don údarás inniúil gur tugadh cuairt ar bord. ***Féadfaidh an doiciméad a bheith ina ráiteas oifigiúil, nach mór do chóras riaracháin an Stáit brataí a eisiúint seachas eagraíocht aitheanta.***
- (4) I gcás inarb iomchuí, ní mór doiciméad eile a bheith ag gabháil leis an iarraidh maidir le deireadh a chur leis an ordú um dhiúltú rochtana, eadhon doiciméad ón gcumann aicmiúcháin a rinne aicmiú ar an long tar éis cuairt ar bord a bheith tugtha ag suirbhéir ón gcumann aicmiúcháin, ar doiciméad é lena léirítear go gcomhlíonann an long na caighdeáin aicme arna leagan síos ag an gcumann sin. Soláthróidh an cumann aicmiúcháin fianaise don údarás inniúil gur tugadh cuairt ar bord.
- (5) Ní fhéadfar deireadh a chur leis an ordú um dhiúltú rochtana ach amháin go dtí go mbeidh an tréimhse dá dtagraítear in Airteagal 16 den Treoir seo imithe thart, agus ní mór don chuideachta iarraidh fhoirmiúil a chur chuig údarás Stáit calafoirt an Bhallstáit a d'fhorchuir an toirmeasc agus na doiciméid a iarradh i míreanna 3 agus 4 a sholáthar.

- (6) Ní mór iarraidh den sórt sin, lena n-áirítear na doiciméid riachtanacha, a chur faoi bhráid an Stáit a bhfuil an toirmeasc á fhorchur aige mí amháin ar a laghad roimh dheireadh na tréimhse toirmisc. Mura gcomhlíontar an spriocdháta sin, féadfaidh moill suas le mí amháin a bheith i gceist tar éis don Stát a bhfuil an toirmeasc á fhorchur aige an iarraidh a fháil.
- (7) Leis an gcóras faisnéise, cuirfear toisc fhorcheannasach leis an long agus léireofar go bhfuil an long incháilithe le haghaidh cigireacht mhéadaithe ag an gcéad chuairt eile **a bheidh aici** ar chalafort/ancaireacht i réigiún Mheabhrán Comhthuisceana Pháras.
- (8) Chomh maith leis sin, tabharfaidh an t-údarás inniúil fógra i scríbhinn faoina chinneadh do chóras riaracháin an Stáit brataí, don chumann aicmiúcháin lena mbaineann, do na Ballstáit eile, do shínteoirí eile le Meabhrán Comhthuisceana Pháras, don Choimisiún agus do Rúnaíocht Mheabhrán Comhthuisceana Pháras. Ní mór don údarás inniúil an bunachar sonraí cigireachta a nuashonrú freisin, gan mhoill, le faisnéis faoin diúltú rochtana.
- (9) Faisnéis a bhaineann le longa ar diúltaíodh rochtain dóibh ar chalafoirt laistigh den Aontas, ní mór í a chur ar fáil sa bhunachar sonraí cigireachta agus í a fhoilsiú i gcomhréir le hAirteagal 26 agus Iarscríbhinn XIII.?

IARSCRÍBHINN VI

IARSCRÍBHINN XII

FEIDHMIÚLACHTAÍ AN BHUNACHAIR SONRAÍ CIGIREACHTA

(dá dtagraítear in Airteagal 24(1))

(1) Beidh na feidhmiúlachtaí seo a leanas, ar a laghad, ag an mbunachar sonraí cigireachta:

- *sonraí cigireachta ó Bhallstáit agus ó gach Stát eile is sínitheoir le Meabhrán Comhthuisceana Pháras a ionchorprú,*
- *sonraí a sholáthar ar an bpróifil riosca loinge agus ar longa a bhfuil cigireacht le déanamh orthu roimh i bhfad,*
- *na gealltanais chigireachta a ríomh in aghaidh gach Ballstáit,*
- *liosta ardfheidhmíochta, liosta meánfheidhmíochta agus liosta ísealfheidhmíochta na Stát brataí, dá dtagraítear in Airteagal 16(1), a tháirgeadh,*
- *sonraí a tháirgeadh ar fheidhmíocht na gcuideachtaí,*
- *na nithe i réimsí riosca atá le seiceáil le linn gach cigireachta a shainaithint.*

- (2) *Beidh sé d'acmhainneacht sa bhunachar sonraí cigireachta dul in oiriúint d'fhorbairtí a tharlóidh amach anseo agus beidh sé d'acmhainneacht ann comhéadan a dhéanamh le bunachair sonraí sábháilteachta muirí eile de chuid an Aontais, lena n-áirítear SafeSeaNet, a sholáthróidh sonraí ar na cuairteanna iarbhír a thugann longa ar chalafoirt na mBallstát agus a sholáthróidh, i gcásanna inarb iomchuí, na sonraí sin do chórais faisnéise náisiúnta ábhartha.*
- (3) *Cuirfear hipearnasc domhain ar fáil a nascann an bunachar sonraí cigireachta leis an gcóras faisnéise Equasis. Molfaidh na Ballstáit do na cigirí na bunachair sonraí phríobháideacha agus phoiblí a bhaineann leis an gcigireacht ar longa agus a bhfuil rochtain orthu trí bhíthin Equasis a úsáid.?*
-